

Romanos

Pablo ishīm Porrosht aabo ōr saludo uje ode dīt Roma.

1 ¹Yok Pablo uje tuu ochichew pahwoso ochibite ana hutita. Yok Jesucristo ir ibik. Porrosht chiihla yok hn chiyuhu yokihi laabo ōr ehēt par uje yok ir apōstol hn shuu tanimīrāha lahwoso titim oso uje Jesucristo ishi ōr hnitewīhi Porrosht ahirkite. ²Porrosht tatim erze israel oso uu ōr profeta poruwo wishī par uje ochichew ir ahwoso. Tatim ōrkite uje chibite lahwoso par uje tyenij Cristo taachīhi īrmo nehe. ³Shi Porrosht tata uje tyenij shuu Deyjīt tāra erze israel oso ōr porokkite rey David par uje shuu wichi tokole hnakirap. ⁴Porrosht chibite orhōta uje Jesús wichi uu ir Ijīt pisht uje shuu ikponi tokolihi erze topo ōr ahir. Porrosht Ichibich yelij niyokōr mīhnik. Wichi uje ishīm Porrosht Ijīt ukurbo. Ir Ijīt wichi Jesucristo uu eyok Irhīch. ⁵Cristo wichi uje sosir yok par uje shuu tomsaha par ir apōstol hn tanimīrāha ir ahwoso titim erze oso uje ode īrmo lekityo par uje ye olotiis Jesucristope hn par uje oshuu Jesucristo dich. ⁶Olak itso ōr, Porrosht chiihla olak par uje uhulo Jesucristo masaha par uje wichi uu olak Yinsirc. ⁷Tuu ochichew pahwoso ochibite ana hutita par tokosim olak uje olak dechi dīt Roma. Porrosht sahmūr olak. Chiihla olak par uje amsahalo par ir aabo. Sehe tuu Porrosht uu eyok Deych hn eyok Irhīch Jesucristo odosir olak hn oduhu olak aho kiis.

Pablo sehe tekirihi Porrosht aabo uje ode dīt Roma.

⁸Sehe titim olak kuche ich kihniya per wap tikinship Porrosht tāra eyok Irhīch Jesucristo ir iich par nos wir olak pork oso uje ode lekityo otata uje olak uje ebuhulo dīt Roma ich ye otiislo eyok Irhīch Jesucristope. ⁹Ich tinaha yok uje tiyokōr Porrosht ir ibiyo pork tanimīrāha ir ahwoso titim ōr uje Jesucristo ishi ōr hnitewīhi Porrosht ahirkite. Porrosht wichi uje chiraha uje shish yok orar tapur ire par olak. ¹⁰Shish yok orar tapur Porrosht kimiji nahmūr ich shuu takaha tekirihi olak shichish. ¹¹Shish sehe takaha par uje tekirihi olak par uje tokosir olak. Shi sehe ma tuu olak duurapo, ¹²hn yok itspo, pork sehe tuu akashimlo yok par tukuurapo hn takashim olak par uje ma ye yotiislo eyok Irhīch.

Porrosht ukurbo de par shuu oso omasaha par ir aabo.

¹³Pishibo watsaklo, sehe tuu erahalo uje shish sehe takaha par uje tekirihi olak per shish kuchêrk sontew yok heke ye yok pwele titîr olakpe. Sehe tuu oso ma okîhniya omasaha par Porrosht aabo par ôya olak shi itso uje tiyokorâha erze Porrosht aabo yewo uje ôr dihipo kinâho. ¹⁴Porrosht ishîm yok lahwoso par uje tanimirâha heke titîm erze griego yewo hn erze dihipo kinâho, hn titîm erze uje ôr eykdeyo hn erze uje ye ôr eyuwîrsh, ¹⁵heke sehe titîr olakihi wahacha dit Roma shichish par uje titîm olak hn erze oso yewo Porrosht ahwoso uje Jesús ishi olak hnitewîhi Porrosht ahirkite. ¹⁶Ye tikipookpe uje titîm oso uje Jesús ishi ôr hnitewîhi Porrosht ahîr, pork kimîji ye olotiis erze ahwoso uje ich ihîrtso ich Porrosht ir ukurbo shuu omasaha par ir aabo. Titîm erze israel oso wap hn titîm erze dihipo kinâho toy. ¹⁷Uje Jesús toho krus eeychkite par uje ishi eyok hnitewîhi Porrosht ahîr ich shuu imeheeych uje Porrosht shiyokôr uje ich om per shi imeheeych par erze uje ye olotiis irpe. Porrosht ahwoso tata shuu itsorz im: —Shi erze uje ye olotiis irpe ich nîhyok ôr hnitew uje de Porrosht ahîr heke ôr owich de ire ahîr.—

Porrosht tyenij sepyêr oso uje oshiyokôr mîhnûwo.

¹⁸Titîm olak uje nos wîr oso uje ye onahmûr Porrosht hn oshiyokôr uje ich mîhnûwo ich otsontew erze ahwoso uje ich ûru uje târa Porrosht, heke oshuu Porrosht chesdelpa hn sitak ôr. Tyenij shuu ochîraha uje sepyêr ôr nehe ich shuu dospa. ¹⁹Nos wîr uje oshiyokôr uje ich mîhnûwo ochîraha uje Porrosht de pork Porrosht sowa ôr. ²⁰Uje îrmo tenitkite ichii Porrosht nos shiyokôr kuche heke nos oso ochîraha uje ire shish de. Ye ôr pwelpe uje onomo ire per ochîraha uje ir ukurbo deyo de, heke ich nîhyok uje yeêk pwele sata irehe Porrosht ile ikich. ²¹Ôr ire ochîraha uje Porrosht de, per ye oduhu Porrosht dichpe, hn ye onîna irpe. Shi oshuu deyuwo tisîrîhi erze kuche uje ye jukur heke ôr eyuwo ich shi itso dihlele. ²²Otata uje ich ôr eykdeyo per wîr shi oshuu ire itso uje ôr totihlo. ²³Porrosht ich hûre hn yelij nihna ire, per oym Porrosht hn oshiyokôr kojano po ochii wîr ir porroshtîhi. Erze kojano po oshiyokôr oshuu itso oso hn shi itso chipîrme hn shi itso loshipo hn shi itso echîre.

²⁴Heke Porrosht iim ôr par uje oshiyokôr erze kuche mîhnûwo uje shi ôr ire otsahmûr. Oshiyokorîhiye erze uje shuu opook. ²⁵Porrosht ich ûru per wîr okoswâha heke ohno oteeychâha erze uje ye Porroshtpe. Shi oteeychâha erze uje Porrosht shiyokôrkite hn oshiyokôr erze kuche ir ibiyo. Porrosht wichi uje nos shiyokôr erze kuche. Wichi uje tyenij onarim ire hn oteeychâha. Ich om uje oniyokôr oduhu ilorz.

²⁶Heke Porrosht iim ôr par uje oshiyokôr erze kuche mîhnûwo uje otsahmûrpa uje shuu oso opook. Tîmcher oym dabiyo par uje ôhyiyer

ahir. ²⁷Hnakirbo òr itspo oym nerēhte par uje òhyiye ahir hn ye opookpe. Otsahmūrpa oshiyokòr erze mihñuwo per ich oshye leshìro hn masaha òr aho.

²⁸Otata uje nīhyok ye Porroshtikish, heke Porrosht iim òr par uje shi oshiyokòr erze kuche mihñuwo uje shish oshuu deyuwo tisìr. ²⁹Shish òr eyuwo tisìr erze kuche mihñuwo uje ich kināho kināho hn ye shi erzepe, ich otsahmūr oshuu yewo doso. Ich otsahmūr uje ochukutirāha ire kuche, hn wir òr iljaabo. Shish opota kuche, hn oshuu yewo oshuu otoy. Otsahmūr uje oshiyokosye, hn otsehnnyērye. Wir òr ehñito, hn ich otsahmūr uje otat lare. ³⁰Otsahmūr uje otatim yet lekushiī par uje oshuu sitak yet. Wir shi otsitak Porrosht, hn ye oduhu yewo òr jukur. Wir shi sehe oduhu ire ma deyo, hn otsahmūr uje otatim oso uje oshiyokòr erze kuche shi par uje onarim ire. Shish oshuu deyuwo tisìr erze kuche ahlo uje ich ma mihñuwo par uje oshiyokòr. Ye oniyokòrpe uje òr deych hn òr data otatim òr. ³¹Wir shi oshuu deyuwo tisìr erze kuche uje ye jukur, hn shish oyehi lahwoso, ye oniyokòrpe. Yelij onuuna uje yewo òr losuhlaabo, per wir otsahmūr uje oshuu oso dospa. ³²Ochirahapa uje Porrosht chibite uje yeēk shiyokòr erze mihñuwo shuu itsorz ich tyenij tìr urhuta bahluta eheth per wir shish oshiyokòr. Hn ye shi erzepe, ich otsahmūr uje yewo oshiyokòr erze kuche mihñuwo itso òr.

Porrosht shuu israel oso hn dihipo kināho òr itsye.

2 ¹Heke titim olak uje olak israel oso. Uje olak yeēk tata uje dihipo kināho oshiyokòr uje ich mihñuwo ich chibite orhòta uje ir iluu ich mihñu toy pork shiyokòr itso òr heke ye pwelpe uje sata ire. ²Yirahalo uje Porrosht shiyokòr om uje sepyēr erze oso uje oshiyokòr erze mihñuwo uje titim olakike. ³Uje olak yeēk tata uje erze yewo oshiyokòr uje ich mihñuwo per ire shiyokòr toy ¿inaapo heke chibite uje Porrosht ye depyēr ire toy petik nehe? ⁴Porrosht shish hneta wichi hn sosir heke chibite uje ye depyēr irpe per ye duhu deyuwo tisìrpe par uje chiraha uje Porrosht sosir ire shi par uje shuu dehet chuuna uje shiyokòr uje ich mihñuwo hn iim hn shiyokòr uje Porrosht sahmūr. ⁵Shish shuu dehet kata hn ye noympe uje shiyokòr erze uje ich mihñuwo par uje shiyokòr uje ich om uje Porrosht sahmūr. Shish shuu Porrosht chesdelo hn ich ehñmürc dich. Uje terihì ese ishìrìt uje sepyēr oso nehe ich sepyēr pishi wichi shuu dospa. Porrosht wichi jwe uje shish shiyokòr uje ich om. ⁶Nos sepyēr erze uje oshiyokòr uje ich mihñuwo. Ye duhu sowepe uje sepyēr òr, hn ye noympe. ⁷Per erze oso uje shish ohneta oso hn otsòsir òr, hn shish oshiyokòr uje ich om par uje oshuu Porrosht tatim òr uje òr ibiyo tokole om ich Porrosht tyenij ishìm wir òr ikirìt uje yelij nihna ire. Wir uje shish oyem Porrosht par uje wichi narim òr, hn shish oyem ese ikirìt uje yelij nihna ire. ⁸Uje terihì ishìrìt nehe ich Porrosht sowāha erze uje oshuu oso

otsitakye. Chesdelpa uje sepyēr ōr uje ye onahmūr oniyokōrpe uje ich ūru uje Porrosht ahwoso tata. Shi sehe oniyokōr uje ich mihnūwo. ⁹Nos wir erze oso uje oshiyokōr uje ich mihnūwo ich tyenij shuu kuche mihnūwo tīr ōr. Wir tyenij ochuuna uje ich dospa. Wap shuu tīr erze israel oso hn par nos wir yewo uje ye ōr israel osope. ¹⁰Per nos wir uje oshiyokōr uje ich om Porrosht tyenij tatim ōr uje oshiyokōr uje ich om, hn Porrosht narim ōr hn shuu ōr aho kiis. Porrosht tyenij tatim erze israel oso shuu itsorz wap hn shuu erze dihipo kināho oyehe israel oso ōr nēr, ¹¹pork Porrosht ye duhu yet kināhape hn duhu yet kinaha. Nos shuu ōr itsye. ¹²Nos wir uje oshiyokōr uje ich mihnūwo uje ye Porrosht nahmūrpe hn erze ley uje Moisés chichewkite nihyokīhi ōr ahir ich Porrosht tyenij shuu otīr urhuta bahluta etet, per ye tatim ōr uje oyuwe erze leype. Per erze uje oshiyokōr uje ich mihnūwo uje ye Porrosht nahmūrpe hn asa ley waa je Moisés chichewkite de ōr ahir ich Porrosht tyenij tatim ōr uje oyuwe asa ley heke tyenij sepyēr ōr toy shuu itsorz. ¹³Erze uje ochunt asa ley per ye oniyokōrpe wir uje nihyok ōr owich Porrosht ahir. Shi erze uje ye otsowepe asa ley hn oshiyokōr uje Porrosht sahmūr wir uje Porrosht tyenij shuu ōr owich de dahir nehe. ¹⁴Nos wir oso uje ye ley chihī ōr ahirpe waa je Moisés chichewkite uje oshiyokōr uje asa ley tata ich shuu imeheeych uje shi itso uje asa ley de ōr aho. ¹⁵Oshuu imeheeych shi itso uje Porrosht chichew asa ley chibite ōr aho pork ochuuna uje oshiyokōr uje mīhnik hn ōr eyuwo shuu ochiraha uje oshiyokōr uje ich mīhnik hn shuu ochiraha toy uje oshiyokōr uje ich om. ¹⁶Heke uje terihī ese ishirīt nehe hn Porrosht shuu Deyjit sepyēr oso uje oshiyokōr uje ich mihnūwo uje otsakis. Uje titim ōr uje Jesucristo ishi ōr hnitewihī Porrosht ahir ich titim ōr toy uje wichi tyenij sepyēr ōr kimiji otsotiis ire.

Israel oso onarim ire.

¹⁷Titim olak yeēk uje ire israelya, hn chibite uje ir owich de Porrosht ahir heke tata uje ire israelya hn shiyokōr asa ley waa je Moisés chichewkite. Ich narim ire pork teeychāha Porrosht. ¹⁸Tata uje chiraha uje Porrosht sahmūr hn yeēk shiyokorāha irni erze ley uje Moisés chichewkite heke chiraha uje ich ma om hn sahmūr. ¹⁹Tata uje chirahapa Porrosht ir iluu heke takashim erze uje ye odirehepe pork ōr itso uje ōr ile pata par uje oshuu ochiraha toy. Tata uje ire itso luu pork shiyokorāha erze uje ōr itso uje ode dihlelta. ²⁰Wichi tata uje pwele shiyokorāha erze uje ye odiraha Porrosht iluupe, hn tata toy uje shiyokorāha pikihnino ijaabo pork erze ley uje Moisés chichewkite shuu chiraha uje ich om hn uje ich ūru. ²¹Owa uje ahakorāha yewo uhu itsorz ¿inaapo heke ye ahakorāha owape? Uje animirāha Porrosht ahwoso ich atim ōr uje ye ompe par otohir. ¿Hap owa, je ohir? ²²Ata uje ye ompe par otorāha dabiyo hn nerēhte. ¿Hap owa, je orāha erāhta? Ata uje ich etakpa erze

kojano po uje oso ochii ir porroshtihî per ¿je amsaha wir òr templo aho par uje orha erze kojano po ir kushjãro uje oso oshimihi? ²³Ata uje ich ahmûr Porrosht ir ley. ¿Je uhu Porrosht disdelo uje aluwe asa ley? ²⁴Porrosht ahwoso tata uje dihipo kinãho ochinehnim Porrosht ir iich pork olak aho yuhurash.

²⁵Kimiji olak yeëk ye sowe erze ley uje Moisés chichewkite ich asa sirkunsisyon uje de ire ich bale, per kimiji sowe asa ley ich ye jukur asa sirkunsisyon. ²⁶Heke kimiji yeëk chihi uje nîhyok ir yarta waa je iich otsii sirkunsisyon per shish shiyokôr uje asa ley tata ich shi itso uje asa yarta de ire. ²⁷Uje etîrlo Porrosht ile ikich nehe kimiji yeëk chihi uje ye ir yarta chihipe waa je iich otsii sirkunsisyon hn ye sowe asa ley ich wichi tyenij denunsya olakihî Porrosht ile ikich olak uje ley de olak ahir hn olak yar de uje iich otsii sirkunsisyon per shish aluwelo asa ley. ²⁸Erze uje òr israel oso òr eyuwo tisîr uje òr israel oso pork òr yar de per Porrosht tata uje wir ye israel oso pishope. Asa yarta wate ye yarta pishtpe shi pork ochiyuhu òr yûhurza pîkaabit. ²⁹Erze israel oso pisho wir uje òr aho kinãho pork asa yarta waa je iich otsii sirkunsisyon de òr aho uje Porrosht Ichibich shiyokôr. Porrosht narim òr, ye hnakirbo onarim òrpe.

3 ¹Heke titim olak. ¿Je om uje olak israel oso o je ye jukur? ¿Je om uje olak yarta de waa je iich otsii sirkunsisyon o je ye jukur? ²Ich om uje olak yarta de hn ich om uje olak israel oso. Wap titim olak uje ich om uje olak israel oso, pork Porrosht ishim olak lahwoso par uje abeylo. ³Kimiji yeniyu olotiis Porrosht ¿je wir oduhu Porrosht sêhi lahwoso? ⁴Ye ürpe pork Porrosht yelij sêhi lahwoso. Nos wir uje ire tata shish ũru. Kimiji nos hnakirbo shi otata lekushiî per Porrosht ahwoso shish ũru pork ir ahwoso tata shuu itsorz im: —Ich imeheeych uje Porrosht ahwoso ich ũru. Uje oso otata uje ire tata dekushiî per shish serz òr.— ⁵Kimiji yewo otata otsii: —Erze kuche mihnúwo uje yiyokôrlo chibite orhõta uje Porrosht shiyokôr uje ich om.— ¿Je om uje otata uje Porrosht shiyokôr uje ich mîhnik uje sepyër òr shuu itsorz? Shi oyiita itso uje hnakirbo otsërza, ye ilo Porroshtpe. ⁶Ye Porrosht niyokôrpe uje ich mîhnik uje sepyër òr shuu itsorz. Kimiji Porrosht ye depyër òr duhu ilorz ich ye pwele depyër erze oso uje ode nãhu îrmo nehe. ⁷Kimiji israel osht tata im: —Uje pukushiî dibite orhõta uje Porrosht tata uje ich ũru hn tuu ire ma dich ¿inaapo heke Porrosht sepyër yok shi itso uje tiyokôr uje mîhnik? ⁸¿Inaapo heke ye yiyokôrlo uje ich mihnúwo par uje erze om tîr eyok?— Oso ode uje otata oshuu itsorz otsii: —Pablo shiyokôr erze kuche mihnúwo heke erze uje ich om tîr ire.— Ich om uje Porrosht sepyër erze oso uje otata lekushiî oshuu itsorz.

Nos oso oshiyokôr uje ich mihnúwo.

⁹Titim olak uje olak israel oso ¿je olak eyuwo tisîr latikpo? ¿Je eyok ma om je erze oso yewo? Ye eyok ma ompe je erze yewo. Tuu imeheeych

uje eyok israel oso hn nos wir oso yewo shi nos eyok itsye. Nos yiyokōrlo uje ich mihñūwo pork eyok iluu mihñū ich shi itso eyok yinsiro.

¹⁰Porrosht ahwoso tata shuu itsorz im: —Nīhyok uje yeēk shiyokōr uje yok ley tata, nīhyok hnii nohmira. ¹¹Nīhyok yeēk uje chiraha Porrosht ir iluu. Nīhyok yeēk uje chukwi pork sehe diraha Porrosht. ¹²Nos wir oso oshiyokōr uje kinaha, ye oniyokōrpe uje Porrosht sahmūr. Nos ōr itsye, oshiyokōr uje ich mihñūwo. Nīhyok yeēk uje shiyokōr uje ich om, hnii nohmira. ¹³Ōr ahwo ich shi itso luke uje shi isāha hn ir aat tokole pork shi otata lahwoso par uje otsehnyēr oso, hn ich ōr ahwo wosdeyo shi itso echire uje ich wosdeyo. ¹⁴Shish ōr ahwoso mihñūwo tokolihi ōr ahwo hn otsajīrye ikiyo. ¹⁵Shish ochimit ire par ooshi otsatsir yewo par uje oshuu ōr oshuu otoy. ¹⁶Nos wir ōr iluu shi par shuu oso ōr kushjāro taata hn shuu ōr dosdarakpa. ¹⁷Ye odirehepe uje oshuu oso ōr aho kiis. ¹⁸Ye otola Porroshtpe.— Wir erze uje Porrosht ahwoso tata.

Nos tyenij ye olotiis Cristope par uje ōr owich de Porrosht ahir.

¹⁹Yirahalo uje erze ley wir par erze israel oso pork wir uje Porrosht ley de ōr ahir. Nos oyuwe erze ley. Nīhyok yeēk pwele sata shuu itsorz heke Porrosht chibite nos wir oso uje ode nāhu ĩrmo ōr hñitew de ire ahir.

²⁰Nīhyok yeēk pwele shiyokōr uje erze ley tata. Shish oyuwe Porrosht ir ley heke ōr hñitew de ire ahir. Ir ley shi shuu ochiraha uje oshiyokōr erze kuche mihñūwo uje ye Porrosht nahmūrpe. ²¹Per ele ahle Porrosht chibite orhōta latikpo uje tyenij oshiyokōr par uje ōr owich de ire ahir. Wichi kinaha pork ye dibitpe uje tyenij oniyokōr uje asa ley tata par uje ōr owich de Porrosht ahir. Erze uje Moisés chichewkite hn erze uje erze profeta poruwo wishi ochichewkite tata uje deeych yet nehe hn yeēk ishi ōr hñitewihi Porrosht ahir. ²²Porrosht chibite uje nīhyok ōr hñitew nos wir erze uje ye olotiis Jesucristope, kimiji ōr israel oso hn kimiji ōr dihipo kināho, ²³pork nos wir oso uje ode ĩrmo lekitiyo nos oshiyokōr uje ich mihñūwo. Nīhyok uje yeēk shi shiyokōr uje ich om itso uje Porrosht sahmūr. ²⁴Shi Porrosht sosir eyok hn shuu eyok owich de dahir. Ye duhu bahatikish. Jesucristo wichi uje ishi eyok hñitewihi Porrosht ahirkite. ²⁵Porrosht shuu Jesucristo tīrēt par uje ir armista noshi hn ishi eyok hñitew, per shi erze uje ye olotiis Cristope wir uje ōr owich de Porrosht ahir. Heke chibite orhōta uje Porrosht shiyokōr uje ich om pork uje ehn yahpaa Cristo taāchkite ich Porrosht shi chihmer erze oso ōr hñitew uje ye olotiis irpe. Uje Cristo taācha hn toy ich ishi ōr hñitewihi Porrosht ahir, ²⁶hn ele ahle ich shish imeheeych uje Porrosht shiyokōr uje ich om pork shish shuu wir ōr owich de dahir erze uje ye olotiis Jesuspe.

²⁷¿Je oso ōr pwele uje onarim irehe Porrosht ile ikich? Nīhyok ye ōr pwelpe. ¿Inaapo heke ye ōr pwele onarim ire oduhu ilorz? ¿Je wir ōr pwele oniyokōr uje asa ley tata par uje ōr owich dechi poōrc? Ye ōr

owich chihipe. Shi òr owich de poõrc pork ye olotiis Cristope. ²⁸Yirahalo uje eyoklo owich de Porrosht ahir shi pork ye yotiislo Cristope, ye pork yiyokõr asa leype. ²⁹¿Je ùru uje Porrosht wichi shi israel oso òr Porrosht? Ye ìlorzpe, wichi nos dihipo òr Porrosht toy. ³⁰Porrosht shi nohmira de, heke erze israel oso òr owich de Porrosht ahir kimiji ye olotiis Cristope, hn nos wir dihipo òr owich de toy kimiji ye olotiis Cristope. ³¹Uje yomsaha par eyok Porrosht aabo shi pork ye yotiis Cristope ¿je ye yuhu jukur asa ley waa je Moisés chichewkite? Ye ùrpe. Shi yuhu asa ley bale pork wate shuu yirahalo uje yiyokõrlo uje mihñũwo heke tyenij ye yotiislo Cristo.

Porrosht aabo ich shi òr itso uje otãra Abraham.

4 ¹Abraham wichi uu eyok porokkite uje eyok israel oso pork nos wir eyok poruwo wishi otãra ire. ¿Abraham niyokõr latikpo par uje ir owich de Porrosht ahir? ²Ye Abraham niyokõrpe uje om par uje shuu ir owich de Porrosht ahir heke ye pwele narim irehe Porrosht ìle ìkich. ³Porrosht ahwoso tata shuu itsorz ìm: —Abraham ye lotiis Porrosht petikkite heke Porrosht ishi ir hnitewihi dahir hn shuu ir owich de dahir.— ⁴Ele ahle ich erahalo uje yeẽk chishew obiyo hn serz hnote wir ye shi odosimihì irpe. Oshim ire pork wir uje ire serz. ⁵Per kimiji yeẽk chihì uje ye lotiis Porrosht uje ishi oso òr hnitewihi dahir, ich Porrosht perdonar erze kuche mihñũwo uje shiyokõr shi pork ye lotiis ire heke shuu ir owich de dahir. Ye niyokõr uje ich om par uje serz ir owich Porrosht ahir.

⁶Rey David lishi tata shuu itsorz toy. Tata uje ich om par ese hnakìrbich uje Porrosht ishi ir hnitewihi dahir pork ye lotiis irpe, per ye doshi par ese uje shiyokõr kuchèrk par uje serz dawich.

⁷David tata shuu itsorz ìm: —Ich om par erze uje Porrosht perdonar òr kuche mihñũwo uje oshiyokõr hn chikey uje oshiyokõr. ⁸Ich om par ese hnakìrbich uje ye Irhìch duhu doshi ir hnitewihi dahirpe.— Wir uje David tata.

⁹Ese om uje David tata ¿je Porrosht shi dosim erze uje òr yarta de waa je iich otsii sirkunsisyon o je dosim toy erze uje nihyok ye òr yãrìrash? Nos yiita uje Porrosht chibìte Abraham ir owich dahir shi pork ye lotiis irpe. ¹⁰¿Je Porrosht tatim Abraham uje ir owich de ire ahir uje ir yarta dekite waa je iich otsii sirkunsisyon o je nihyok ye ir yãrìrash? Uje ehn nihyok ye ir yãrìrash ich Porrosht tatim ire ¹¹ìm: —Ebìte owa yarta par uje eraha uje owa owich de pahìr pork ye otiis yokpe.— Heke Abraham wichi uu òr poorc nos wir erze uje ye olotiis Porroshtpe uje nihyok ye òr yãrìrash waa je iich otsii sirkunsisyon. Porrosht nos ishi òr hnitew uje de ire ahir. ¹²Abraham wichi uu òr poorc toy nos wir erze israel oso uje ye olotiis Porroshtpe uje òr yar de waa je iich otsii sirkunsisyon, per

otseēt Abraham toy uje ye olotiis Porrosht petikkite uje ehn nīhyok ye ir yārirash.

Porrosht chibite lahwoso par ishim daabo ĩrmo nehe.

¹³Eseekite hn Porrosht chibite lahwoso par uje ishimihĩ ĩrmo Abraham hn erze uje otāra ire. Shi tatim ire pork wichi ye lotiis irpe heke Porrosht chibite uje tyenij ishi ir hñitewihĩ dahir. Abraham ye niyokōr uje erze ley tata par shuu Porrosht tatim ire shuu itsorz. ¹⁴Porrosht shi ishim ĩrmo erze uje ye olotiis irpe. Ye dosim erze uje oshiyokōr uje erze ley tata. Wir shi sehe oduhu tokole uje ye jukur uje ye olotiis Porroshtpe, hn ye jukur erze ir ahwoso uje chibite, per ye ōr pwelpe. ¹⁵Uje ley de, ich shuu sepyēr erze uje oshiyokōr uje ich mihñūwo, per kimiji nīhyok ley ich ye ōr pwele otsowepe. ¹⁶Heke ōr owich dechi Porrosht ahir per shi par erze uje ye olotiis irpe. Erze uje Porrosht chibite lahwoso tatim Abraham wir shi pork Porrosht sehe dosir oso. Tyenij yakaha erze oso uje otāra Abraham. Ye shi par erze israel osope uje ye olotiis Porroshtpe hn asa ley de ōr ahir waa je Moisés chichewkite. Erze uje Porrosht tatim ire wir par erze dihipo kināho toy uje ye olotiis Porroshtpe shi ōr itso uje Abraham ye lotiis Porrosht petikkite. Wir shi ōr itso uje otāra Abraham lishi heke Abraham wichi nos eyok poorc. ¹⁷Porrosht ahwoso tata uje Porrosht tatim Abraham im: —Tuu dihipo okihniya ode nehe uje shi ōr itso uje otāra owa.— Heke Porrosht chibite shi itso uje otāra Abraham. Wichi uu Porrosht pisht uje ye Abraham lotiispe. Wichi uje ishim topo ōr ikirīt, hn nos shiyokōr wir kuche uje wapkite ich nīhyok. ¹⁸Abraham irāhta ich ebir heke ye ōr ĩjirsh per Abraham shish ye lotiis Porroshtpe uje tatim ire uje dihipo okihniya otāra ire pork Porrosht tatim irkite im: —Tuu okihniya uje otāra owa nehe.— ¹⁹Abraham shuu deyuwo tisīr uje ich yej terihi uje toy pork ich ta par terihi syen āyo per shish ye koswāha Porroshtpe. Shuu deyuwo tisīr uje Sara ich ĩlarpa hn ebir per shish ye koswāha Porroshtpe. ²⁰Ye lotiis Porrosht ahwospe uje chibite tatim irkite hnii pikaap. Shi ma chibite uje Porrosht ahwoso tyenij yakaha, hn shish nina Porrosht. ²¹Chirahapa uje Porrosht pwele shiyokōr uje tatim irkite. ²²Uje ye lotiis Porroshtpe shuu itsorz ich Porrosht chibite uje tyenij ishi ir hñitewihĩ dahir hn shuu ir owich de dahir.

²³Uje Porrosht shuu ochichew lahwoso uje tyenij ishi Abraham ir hñitewihĩ dahir ich ye duhu odichewpe shi par Abraham. ²⁴Shuu ochichew par eyok toy. Tyenij ishi par eyoklo toy uje ye yotiislo Porrosht uje shuu eyok ĩrhīch Jesús tokolihi erze topo ōr ahirkite. ²⁵Wichi Jesús uje oshuu oshuu toy par uje ishi eyok hñitewihĩ Porrosht ahir pork yiyokōrlo uje ich mihñūwo. Porrosht shuu ikpokite uje nos ishi eyok hñitewihĩ Porrosht ahir.

Jesús ishi oso ōr hñitewihĩ Porrosht ahir.

5 ¹Titim olak uje eyok ĩrhīch Jesucristo ishi eyok hñitewihĩ Porrosht ahir ich shuu Porrosht ehēt kiisihĩ eyoklo shi pork ye yotiis irpe.

²Heke Cristo shuu Porrosht kahnir eyoklo pork nĩhyok ye eyok hnitew chihĩ ire ahirpe shi pork ye yotiis irpe. Ich eyok ayla uje yirahalo uje deeych yet nehe hn shuu eyok iluu itso Porrosht ir iluuta hn yebuhulo ire ahir. ³Ye shi eyok ayla yuhu itsorz. Eyok ayla toy uje kuche mihnuwo tĩr eyoklo pork yirahalo uje erze kuche mihnuwo shi tĩr eyok par ma shuu eyok ukurbosh par uje ma eyok ewenta erze kuche. ⁴Uje shish ma eyok ewenta ich shuu eyok iluu ma om itso uje Porrosht sahmũr. Uje eyok iluu om itsorz ich shuu yirahapa uje Porrosht ahwoso shish yakaha. ⁵Yelij sēhi lahwoso heke ye duhu yipooklope pork Porrosht chibite Dechibich eyok aho uje shuu yirahalo uje Porrosht sahmũr pishi eyok.

⁶Antkite hn eyok hnitew de Porrosht ahir pork nĩhyok uje yeēk pwele ishi. Uje terihĩ ese ishirĩtkite uje ich om hn Cristo toy par uje ishi oso ōr hnitewihĩ Porrosht ahir pork nos oshiyokōr uje ich mihnuwo. ⁷Nĩhyok yeēk uje ishimihĩ ire par uje oshuu oshuu toy par uje ye oduhu yet uje shish shiyokōr asa ley waa je Moisés chichewkite. Per kimiji sehe oduhu oduhu toy ese yet uje iluu om kimiji yeēk chihĩ uje sahmũr ire hn ishimihĩ ire par uje masaha owich shuu oshuu ire oshuu toy ⁸per Porrosht sowa eyok uje ich sahmũr pishi eyok shuu itsorz. Uje ehn yiyokōrlo kuche mihnuwo ich Porrosht shuu Cristo toy par uje ishi eyok hnitewihĩ dahir. ⁹Heke ele ahle ich ye eyok hnitew chihĩ Porrosht ahirpe pork Cristo tooho krus eeych. Ir armista noshĩ par uje ishi eyok hnitewihĩ Porrosht ahir. Ich ūrpa uje Cristo shish sosir eyok par uje ye Porrosht depyēr eyok nehe hn nimchaha eyok urhuta bahluta ehēt. ¹⁰Ich imeheeych uje itsorz pork uje ehn eyok Porrosht imāhoni ich shuu Deyjĩt tooho krus eeych par uje shuu Porrosht ehēt kiisihĩ eyok. Ele ahle ich Porrosht ehēt kiisihĩ eyok heke ich ūru uje eyok tyenij yebuhulo Porrosht ahir nehe pork Cristo ikponi hn takashim eyoklo. ¹¹Ye shi erzepe. Eyok ayla toy pork Porrosht wichi eyok Porrosht, pork eyok frhĩch Jesucristo shuu Porrosht ehēt kiisihĩ eyoklo.

Adán shuu mihnuwo de ĩrmo hn Cristo shuu ikirĩt de Porrosht ahir.

¹²Eseekite uje ĩrmo tenit ich nĩhyok ye latik toy, per shi hnakirbich nohmĩra shuu erze kuch mihnuwo tĩr ĩrmo, heke nos oso tyenij otoy pork nos oshiyokōr uje ich mihnuwo. ¹³Ehn yahpaa Moisés dichew asa leykite ich shish erze kuche mihnuwo de nāhu ĩrmo. Per kimiji nĩhyok ye ley chihĩpe ich ye ōr pwelpe uje otata uje oyuwe ley pork nĩhyok. ¹⁴Uje Adán lishĩ de nehech terihĩ uje Moisés lishĩ de ich shish otoy shi itso uje oyuwe ley, per ye oniyokōrpe ese kuchĩt mĩhnt uje Adán shiyokōr. Adán sohmĩra uje shiyokōr kuche dich hn Cristo sohmĩra uje shiyokōr kuche dich toy uje tirēt iyehe Adán nēr. ¹⁵Per ese uje Cristo ishimihĩ oso ich kinaha hn ese uje Adán shuu tĩr oso ich kinaha toy. Ese uje Adán shiyokōrkite shuu nos oso tyenij otoy, per ese uje Porrosht shiyokōrkite sosir oso okĩhniya

pork ese hnakirbich uje ishi òr hnitewihi Porrosht ahir wichi Jesucristo hn ese uje shiyokòr ye bahatikish. ¹⁶Ese kuchit mihnt uje ese hnakirbich shiyokòrkite wichi kinaha, hn ese uje ich ihìrt uje Porrosht ishimihì eyok wichi kinaha. Adán iyuwe uje Porrosht tata heke shuu Porrosht sepyèr oso shuu otìr urhuta bahluta ehèt nehe per Porrosht sehe dosir oso hn ye duhu bahatikish. Oso oshiyokòr kuche mihnúwo ich kihniya per wichi ishi erze oso òr hnitew. ¹⁷Shi ese kuchit mihnt nohmira uje ese hnakirbich shiyokòrkite ichii shuu nos oso otoy, per ich ùrpa uje erze uje ye olotiis Porroshtpe ich Porrosht nos perdonar òr. Ye duhu bahatikish pork Jesucristo wichi hnakirbich uje shiyokòr uje ich om heke shuu òr ikirìt de uje yelij nihna ire.

¹⁸Ese kuchit mihnt uje Adán shiyokòr wichi uje shuu nos otìr urhuta bahluta ehèt nehe, per ese uje ich ihìrt uje Jesucristo shiyokòr par uje sosir erze oso uje ye olotiis ire ich ishi òr hnitewihi Porrosht ahir hn shuu nos òr ikirìt de Porrosht ahir. ¹⁹Adán ye niyokòrpe uje Porrosht tatim ire heke shuu nos oso oshiyokòr uje mihnúwo, per Jesús wichi uje nos shiyokòr uje Porrosht tatim ire heke shuu oso okihniya uje nìhyok òr hnitewihi Porrosht ahir. ²⁰Asa ley waa je Moisés chichewkìte shuu imeheeych uje nos oshiyokòr uje ich mihnúwo pork nos oyuwe erze ley per Porrosht shi shuu ma imeheeych uje sosir oso. ²¹Erze kuche mihnúwo uje oshiyokòr wir shuu otoy hn tyenij seya òr urhuta bahluta ehèt nehe, per Porrosht ich sahmùr pishì oso heke eyok Ìrhìch Jesucristo ishi oso òr hnitewihi dahìrkite par uje shuu òr ikirìt de uje yelij nihna ire kimìji ye olotiis ìrpe.

Porrosht aabo tyenij oym oshiyokòr uje mihnúwo.

6 ¹¿Je yiyokòrlo latikpo? ¿Je ma om yesh yiyokòrlo uje mihnúwo par uje yuhu ma imeheeych uje Porrosht dosir eyok? ²Ye ompe uje yiyokòrlo yuhulo itsorz. Eyok uje yomsahalo par eyok Porrosht aabo ich shi itso uje yitilo pork ich ye yiyokòrlope erze uje ich mihnúwo. Uje eyok itso erze topo ich ye ompe uje yiyokòrlo erze kuche mihnúwopo. ³¿Je ye erahalope nos wir erze uje oshuu otohirm ire pork wir ye olotiis Jesucristope wir shi òr itso uje otoy hn òya Jesús uje tokite? ⁴Uje otohirm eyok ich shi itso uje yitilo hn ochihitsim eyok yukwìya Cristo uje ochihitsim ire. Cristo ìr Deych chìra lakirbo shuu ikpo tokolìhi erze topo òr ahir, hn uje otohirm eyok uje ochiyuhu eyok awit uut ich shi itso uje eyok ikpo hn eyok ikirìt ich ahle.

⁵Kimìji shi ìlo uje yiti hn ochihitsim eyok yukwìya Cristo yuhu itsorz heke ich shi itso uje yukwìya Cristo uje ikpo pork tyenij eyok ikpo nehe. ⁶Yirahalo uje erze eyok iluu ìler uje de eyok aho par uje shuu yiyokòrlo uje ich mihnúwo wir shi itso uje ìya Cristo uje tooho krus eeych par uje Cristo chiyuhu wir eyok aho. Heke ye erze kuche mihnúwo dii eyok delohope, ⁷pork uje yeèk toy ich ye erze kuche mihnúwo dii delakìhìpe.

⁸Kimiji shi ilo uje yiti yukwīya Cristo uje toni ich ye yotiis uje tyenij eyok ikpo nehe hn yebuhu Cristo ahir. ⁹Yirahalo uje Porrosht shuu Cristo ikponi tokolihi erze topo ōr ahir hn ich yelij toypo petik nehe pork ich nīhyok uje yeēk pwele shuu toypo. ¹⁰Uje Cristo tokite ich nos ishi eyok hnitew pork yiyokōr uje ich mīhnūwo per ich ye toypo petik nehe. Ele ahle ir ikirīt de shi par shiyokōr uje Porrosht sahmūr. ¹¹Olak itspo tyenij uhu olak ilo erze topo pork wir ich ye oniyokōrpe uje mīhnik, heke ele ahle ich olak ikirīt de shi par uje ahakōrlo uje Porrosht sahmūr pork ye otiislo Jesucristope.

¹²Heke ye ompe uje uhulo erze kuche mīhnūwo yakaha olak uhulo itso uje wir uu olak yinsiro hn shuu olak eyuwo tisīr par ahakōrlo uje mīhnūwo. ¹³Ye asimlo olak ikiyo erze kuche mīhnūwo par uje shiyokōr. Shi tyenij asimlo olak Porrosht uhu olak ilo yeēk uje toy hn ikpo shi par uje shiyokōr uje Porrosht sahmūr. Asimlo olak ikiyo Porrosht par uje shiyokōr uje ire sahmūr. ¹⁴Ye ompe uje eylo erze kuche mīhnūwo olak yinsiroho par uje chīpa olak pork erze ley ye dii olak delohope. Shi Porrosht wichi uje sosir olak.

Shish oso ōr yinsiro de kimiji Porrosht o kimiji kuche mīhnūwo.

¹⁵Titim olak. ¿Yiyokōrlo latikpo? ¿Je om uje yiyokōrlo erze kuche mīhnūwo pork ye ley nontew eyokpe, hn shish Porrosht perdonar eyok? Ye ompe uje yiyokōrlo yuhulo itsorz. ¹⁶Ich erahalpa, kimiji asimlo olak yeēk par uje wichi uu olak irhīch ich tokole uje olak ir yilo par uje ahakōrlo uje ire sahmūr. Heke uje ahakōrlo erze kuche mīhnūwo ich olak erze kuche mīhnūwo ir yilo hn erze kuche mīhnūwo tyenij shuu atilo. Per kimiji asimlo olak Porrosht hn ahakōrlo uje ire sahmūr ich erze uje ich om uje ahakōrlo wir tyenij seya olak Porrosht ahir nehe. ¹⁷Ich tikinship Porrosht par olak pork uje wapni erze kuche mīhnūwo wir uu olak yinsiro, per ele ahle ich ahakōrlo uje ich om uje oshiyokōrāha olakni hn ye uhu olak aho yūhirshpe. ¹⁸Ele ahle ich ye erze kuche mīhnūwo dii olak delohope per amsahalo par eey wichi olak ihirtīhi Porrosht hn olak ir yilo. ¹⁹Uje tikitkēr olak ich shi teēt erze ahwoso uje olak erahalo. Kimiji tiita kinaha ich ye erahalope. Wapkite asimlo olak erze kuche mīhnūwo par uje ahakōrlo hn shish ahakōrlo uje ich ma mīhnūwo, per ele ahle ich asimlo olak par uje ahakōrlo uje ich om hn olak Porrosht ir yilo. ²⁰Wapkite shi olak erze kuche mīhnūwo ir yilo. Erze uje ich om ich ye uhulo jukur par uje ahakōrlo.

²¹Uje ahakōrlo erze kuche mīhnūwo uje ich uhurc ¿je erzlo latikpo? Erze kuche mīhnūwo uje ahakōrlo shi shuu apooklo nehech shuu atilo. ²²Ele ahle Jesucristo chiyuhu olak erze kuche mīhnūwo par uje ye wir dii olak delohope hn shuu olak Porrosht ir yilo. Uje olak Porrosht ir yilo ich shuu ahakōrlo uje ire sahmūr. Uje uhurc nehe ich olak ikirīt de uje yelij

nihna ire. ²³Uje terihi ese deeych uje onishii erze uje shish oshiyokōr uje ich mihñūwo ich otserz ese bahat uje seya ōr urhuta bahluta eheth, per ese uje Porrosht ishimihī eyok wichī ikirīt uje yelij nihna ire pork ye yotiis eyok Irhīch Jesucristope.

Pablo siteēta timcharrza uje ir abich toy.

7 ¹Pishibo watsaklo, shi titim olak uje olak israel oso uje erahalo erze ley uje Moisés chichewkite. Erahalo uje erze ley wir shi par erze uje ich yesh ōr ika, ye par topope. ²Shi titeēta, kimiji timcharrza abich chihī hn iim par īhi yet ahir ich iyuwe asa ley, per kimiji ir abich toy hn wate īhi yet ahir ich ye sowe asa leype. ³Heke kimiji ye ir abich toy hn shi īhi yet ahir ich wate torāha dabich per kimiji wate abich toy ich pwele īhi yet ahir. Ich ye sowe asa leype pork ye torāha dabichpe. ⁴Pishibo watsaklo, shi eyok itso wate pork uje yapurlo Cristo par uje ishi eyok hñitewihī Porrosht ahirni ich shi itso uje yitilo, heke ye erze ley dii eyok delohope hn pwele yomsaha par yet ir yilo. Ele ahle ich eyok Cristo ir yilo. Wichī uje ikponi. Eyok ir yilo par uje yiyokōrlo uje Porrosht sahmūr, pork shi eyok itso erze pohir uje ich om heke shish ir ee de uje ich om. ⁵Uje ehn yahpaa yomsaha par uje eyok Porrosht aabo ich shish yahmūr uje mihñūwo. Uje yunt uje erze ley tata uje ye ompe uje yiyokōr kuche uje ich mihñūwo, ichii sehe eyok prowā par yiyokōr, hn erze kuch mihñūwo wir uje shuu oso otoy hn seya ōr urhuta bahluta eheth. ⁶Ele ahle ich shi itso uje yiti heke ye erze ley dii eyok delohope. Ich eyok ikirīt ahle de hn Porrosht Ichibich de eyok aho heke tyenij yiyokōr uje ire sahmūr, ye erze ley dii eyok delohope uje Moisés chichewkite.

Pablo tata uje mihñūwo de ire eheth uje sehe dii ir delakihī.

⁷Titim olak. ¿Yiita latikpo? ¿Je om uje yitilo uje Porrosht ir ley ich mihñū? Ye ompe uje yitilo yuhulo itsorz. Kimiji nihyok ley ich ye tikirehepe uje mihñūwo. Kimiji nihyok ley ich ye tikirehepe uje tobīta kuche ich tiyokōr uje ich mihñik pork Porrosht ley tata im: —Ye abīta kuche.— ⁸Uje tukunt uje erze ley tata uje ye ompe opota kuche ichii tobīta kuche ich kihniya. Kimiji nihyok ley erze kuche mihñūwo wir shi itso topo pork nihyok yeēk chiraha uje ich mihñūwo. ⁹Uje ehn yahpaa tikirehepe uje erze ley tata ich pikirīt de, per uje tikirahani uje erze ley tata ich shuu imeheeych uje yok tikiyuwe. Tikiraha toy uje yok tyenij tikiti pork tiyokōr uje ich mihñūwo. ¹⁰Erze ley tata uje tyenij tiyokōr par uje terz pikirīt uje yelij nihna ire, per shi shuu imeheeych uje tyenij tikiti. ¹¹Pīluuta mihñū. Wate uje sehnyēr yok pork shuu tikiyuwe erze ley, heke tyenij tikiti. ¹²Per nos wir Porrosht ir ley wir tāra ire. Kal nohmīr uje Porrosht chibīte wir shi tāra ire, hn shuu oso oshiyokōr uje ich om hn sepyēr erze uje oyuwe. Kal ley uje Porrosht chibīte wir ich om, ¹³per erze uje ich om ¿je wir duhu tikiti?

Ye duhu tikitipe. Shuu imeheeych uje tiyokör kuche mihñüwo. Shi erze kuche mihñüwo uje tiyokör wir uje tyenij shuu tikití. Erze ley ich om. Shuu imeheeych uje tiyokör uje ich mihñüwo pisho. ¹⁴Yirahalo erze ley shi tãra Porrosht, per yok shi yok írmo os hn shi itso uje yeëk chiwãha yokíhi erze kuche mihñüwo par uje tomsaha par uje erze kuche mihñüwo wir uu yok írñich. ¹⁵¿Inaapo heke shish tiyokör erze uje ye tahmürpe? Ye tiyokörpe uje tahmür per tiyokör erze uje ye tahmürpe. ¹⁶Uje tiyokör uje ye tahmürpe ich tuu imeheeych uje erze ley ich om pork ley tata toy uje ich mihñik erze uje ye tahmürpe, ¹⁷heke ich ye yokpe uje tiyokör erze mihñüwo. Shi erze kuche mihñüwo uje de pehet wir uje shuu tiyokör, ¹⁸per yok tikiraha uje nihyok erze uje ich om uje de piluuta ilarrza eheth. Sehe tiyokör uje ich om per ye yok pwelpe. ¹⁹Ye tiyokör erze uje ich om uje sehe tiyokör. Shi tiyokör erze kuche mihñüwo uje ye tahmürpe par uje tiyokör. ²⁰Kimiji tiyokör erze uje ye tahmürpe heke ich ye yokpe uje tiyokör. Shi asa piluuta ilarrza wate uje shuu tiyokör.

²¹Heke tikiraha uje kuchêrk de pehet pork uje sehe tiyokör uje ich om ich mihñüwo dechi. Wate piluuta ilarrza uje shuu tiyokör mihñik. ²²Yok piluuta ahle shuu tahmür tiyokör uje Porrosht sahmür. ²³Tikiraha uje kuche kinãho de yok pork sitak erze uje Porrosht sahmür uje yok sehe tiyokör. Erze kuche mihñüwo uje de yok wir chii yok delakíhi. ²⁴Heke yok itso hnakírbich uje írjaabíkpa. ¿Yeëkpo uje pwele chiyuhu yokíhi asa piluuta mihñüta uje de yok uje chii yok delakíhi? ²⁵Ich tikinship Porrosht pork eyok írñich Jesucristo wichi uje chiyuhu yokíhi asa piluuta ilarrza. Ele ahle tikiraha uje yok Porrosht yilak shi par tiyokör uje ire sahmür. Uje tokoym tuu peyuwo tisírñi Porrosht ich tiyokör tuu yok itso oso yewo hn erze kuche mihñüwo uje de piluuta ilarrza wir uje chii yok delakíhi.

Ich om oshuu Porrosht Ichibich iyeebe hn oyehe nêr.

8 ¹Nos wir uje ye olotiis Jesucristope wir uje ye otír urhuta bahluta eheth nehe. ²Porrosht Ichibich ishím ór ikirít uje yelij nihna ire pork ye olotiis Jesucristope, hn chiyuhu ór par uje erze kuche mihñüwo ye dii ór delohope. Erze kuche mihñüwo seya oso urhuta bahluta eheth nehe. ³Kimiji yiyokör uje erze ley tata uje Moisés chichewkite ich eyok ikirít de uje yelij nihna ire per ye eyok pwele yiyokörpe, heke Porrosht sosír eyok hn shuu Deyjít tirét par uje ishi eyok hnitewíhi dahír. Shuu Cristo shúrha per ye niyokörpe uje mihñik mahn oso oshiyokör. Wichi chiyuhu eyokíhi erze kuche mihñüwo par uje ye wir dii eyok delohope. ⁴Erze ley uje Moisés chichewkite wir ich om. Uje yibíte uje yuhu Porrosht Ichibich iyeebe hn yiyehé nêr ich yiyokör uje erze ley tata, per kimiji shi yiyokör uje shi eyok yahmür ich ye yiyokörpe uje erze ley tata.

⁵Nos wir oso uje shish oshuu deyuwo tisírñi erze kuche uje de nãhu írmo ich shish oshiyokör erze mihñüwo uje ór ire otsahmür, per nos

wir oso uje oshuu deyuwo tisirīhi uje Porrosht Ichibich sahmūr ich shi oshiyokōr uje ire sahmūr. ⁶Uje shi oshuu deyuwo tisirīhi erze kuche uje de nāhu ĩrmo ich erze mihñūwo uje de nāhu ĩrmo tyenij seya ōr urhuta bahluta ehēt nehe, per erze uje shi oshuu deyuwo tisirīhi uje Porrosht Ichibich sahmūr ich ōr ikirīt de uje yelij nihna ire hn ōr aho kiis. ⁷Nos wir uje shi oshuu deyuwo tisirīhi erze kuche uje de nāhu ĩrmo wir Porrosht ir imāho pork ye onahmūrpe oniyokōr uje Porrosht ir ley tata, hn kimiji ōr prowa oniyokōr uje erze ley tata ich ye ōr pwelpe. ⁸Nos wir uje shish oshiyokōr erze kuche mihñūwo uje de nāhu ĩrmo wir ye ōr pwelpe oniyokōr uje Porrosht sahmūr. ⁹Kimiji ūru uje Porrosht Ichibich chīhi olak aho ich ye ahakōrlope erze olak iluu iler. Shi ahakōrlo uje Porrosht Ichibich sahmūr. Nos wir erze uje ye Porrosht Ichibich chīhi ōr ahope wir ye Porrosht aabo, ¹⁰per uje Cristo de olak aho ich olak ichibiyo ikirīt de pork Jesús ishi olak hñitewīhi Porrosht ahirkite. Kuche mihñūwo de nāhu ĩrmo heke Porrosht chibite uje nos oso tyenij otoy, heke eyok yūhurra tyenij toy nehe. ¹¹Porrosht shuu Jesucristo ikponi chīra Dechibich par uje tokolihi erze topo ōr ahir. Kimiji Porrosht Ichibich chīhi olak aho ich Porrosht tyenij shuu Dechibich shuu olak yūhurra ikpo nehe itso Cristo uje ikponi.

¹²Pishibo watsaklo, heke titim olak. Ye uhu erze olak iluu iler dirok olak par uje ahakōrlo uje sahmūr. ¹³Kimiji shish ahakōrlo uje olak iluu iler sahmūr ich tyenij atilo, per kimiji ahakōrlo uje Porrosht Ichibich sahmūr ich uhulo erze olak iluu iler shi itso uje toy pork ye ahakōrlope uje sahmūr, heke olak ikirīt de. ¹⁴Nos wir erze uje oshuu Porrosht Ichibich iyeebe hn oyehe nēr wir Porrosht aabo. ¹⁵Porrosht ye duhu olak ilo uje olak shi yeēk ir yilo uje ich atililpa. Porrosht shuu amsahalo par olak ir aabo pork ich ūru uje eyok Porrosht aabo pisho. Yibiilo Porrosht yuhulo itsorz im: —Dii Porrosht,— ¹⁶pork Porrosht Ichibich tatim eyok ichibiyo uje eyok Porrosht aabo. ¹⁷Ich ūru uje eyok Porrosht aabo, heke erze Porrosht kushjāro uje de ire ahir wir par eyok toy shi itso uje wir par Cristo toy pork shish eyok ewenta erze kuche mihñūwo uje tīr eyok shi pork ye yotiis Cristope. Uje ich terihi uhurc nehe ich eyok owich ihīrtpa de Cristo ahir.

Porrosht tyenij nishii ĩrmo nehe.

¹⁸Heke titim olak uje erze kuche mihñūwo uje yesh tīr eyokihī nāhu ĩrmo ye yiteēta erze uje ich ihīrtso uje de wahacha poōrc. Wir uje Porrosht tyenij sowa eyok nehe. ¹⁹Heke nos wir uje Porrosht shiyokōrkite ich tarāha uje Porrosht chibite laabo ōr orhōta nehe. ²⁰Porrosht sajir ĩrmo ikiyokite heke ye ilope uu ĩrmo tenit. Shiyokōr shuu itsorz pork ire sehe niyokōr duhu ilorz. Ye niyokōrpe uje ich ma om par ĩrmo per deeych yet nehe hn Porrosht nishiipo. ²¹Nos wir kuche uje de nāhu ĩrmo ich nos

sihna ire, per deeych yet nehe hn Porrosht nishiipo par uje ich ye nihna irpe. Shish tyenij de nehe shi itso wir Porrosht aabo. ²²Yirahalo uje nos wir kuche shish sihna ire per wir shi itso oso uje ihnakosh uje ewenta nehech ele ahle shi itso asa timcharrza ewenta uje ir ijit tabita nehech shūrha. ²³Eyok itspo yiyem ese deeych pork Porrosht Ichibich de eyok aho. Wichi webich os uje ishimihī eyokni hn yehe kuche yewo de uje tyenij ishimihī eyok. Ich eyok aho ihnakosh uje ich yitirāha ese deeych uje Porrosht chibite eyok orhōta uje eyok ir aabo, hn shuu eyok yūhurrza ikpo hn shuu ahle. ²⁴Yiraha uje eyok owich de Porrosht ahir heke shish yiyem par uje yitir ire ahir. Uje yumo erze kuche ich ye yiyempe pork eyok dechi. Nihyok yeēk uje shish iyem erze kuche uje de ire ahir, ²⁵per eyok yesh yiyem erze uje ye yumpe, hn shi yinta nehech terihi ese deeych nehe.

²⁶Uje yiyem yuhu itsorz hn erze uje tir eyok ich ye eyok pwele ewentpe hn ye yirahape latikpo uje ich ma om par uje eyok orar yapur Porrosht ich Porrosht Ichibich takashim eyok hn orar par eyok. Ir ahwoso ich shi itso oso or ihna heke nihyok yeēk pwele tata uje Porrosht Ichibich tatim Porrosht. ²⁷Porrosht shish teychim oso or aho kimiji om o kimiji ye ompe. Wichi chiraha Dechibich ir eyuwo pork uje Porrosht Ichibich sapur Porrosht par nos wir ir aabo ich shish sapur uje Porrosht sahmur.

Porrosht aabo tyenij otserz erze mihnūwo nehe.

²⁸Titim olak. Yirahalo uje nos wir kuche uje tir eyoklo uje yahmūro Porrosht ich Porrosht shish shuu tokole uje ich om par eyoklo nehe. Porrosht chihla eyoklo par uje yiyokōro uje ire sahmur. ²⁹Uje ehn yahpaa Porrosht niyokōr irmōkite ichi chiraha yeniipo uje tyenij omasaha par ir aabo nehe. Heke Porrosht chibitkite uje ich uhurc nehe hn ir aabo or iluu tyenij tokole itso Deyjit ir iluuta, heke ir Ijit wichi webich os hn deshībo hn nanime ode ich okihniya. ³⁰Erze uje Porrosht chibitkite uje or iluu tokole itso Cristo ir iluuta nehe wir uje Porrosht chihla or, hn erze uje chihla or wir uje shuu Cristo ishi or hnitewihī dahir. Erze uje ishi or hnitew wir uje shuu or owich de dahir.

³¹Erze uje titim olakike ich ihirt pisho. Ye latik pwele sontew uje Porrosht sosir eyok, heke ye latik pwele uje sontew eyok par uje ye yitir ire ahir nehe. ³²Porrosht ye narhak Deyjitpe. Ishim osokite par uje wichi nos ishi eyok hnitewihī Porrosht ahir, heke tyenij nos ishimihī eyok erze kuche nehe shuu itso uje ishim Deyjit toy. ³³Ye latik pwele denunsya erze uje Porrosht chihla or pork Porrosht wichi uje ishi or hnitewihī dahir. ³⁴¿Yeēkpo uje pwele tata uje eyok tyenij yitir urhuta bahluta etet nehe? Jesucristo ye tatpe duhu ilorz pork wichi uje tokite par uje ishi eyok hnitewihī dahir. Porrosht chiyuhu Cristo erze topo or ahir hn ele ahle sakaha Porrosht waächta pork wichi ich dich. Wichi shish sapur Porrosht

par eyok. ³⁵ ¿Yeëkpo uje pwele shuu Cristo iim uje sahmūr eyok? Kimiji mihñūwo tīr eyok, ¿je wichi noym eyok? Ye noym eyokpe. Kimiji kuchērک masaha eyok uje ich dospa, o kimiji oniyokōr mihnikāhi eyok pork ye yotiis irpe, o kimiji sewit nēhi eyok, o kimiji nīhyok ye eyok ishuwārsh, o kimiji kuchērک sehe dishew eyok uje ich yarhakpa, o kimiji yeëk duhu eyok duhu yiti, ¿je wichi noym eyok? Wichi ye noym eyokpe uje sahmūr eyok. ³⁶ Porrosht ahwoso tata uje yeëk tatim Porrosht shuu itsorz im: —Shish ode uje sehe oduhu ōryok oduhu oyiti pork ye oyotiis owape. Oshuu ōryok itso obeje uje ohnoy par uje sehe oduhu.— Wir uje Porrosht ahwoso tata shuu itsorz. ³⁷ Uje nos wir kuche tīr eyok ich shish yerz pork Porrosht sahmūr eyok hn sosir eyok. ³⁸ Tikiraha uje ye latik pwele shuu Porrosht iim uje sahmūr eyok. Uje oshuu eyok oshuu yiti ich shish sahmūr eyok. Uje yesh eyok ika nīhyok kuchērک uje pwele shuu Porrosht iim eyok, hnii erze ir anjele, hnii erze ichibiyo mihñūwo, hnii kuchērک uje de hn uje de nehe, hnii erze uje ōr ukurbo deyo de, ³⁹ hnii erze uje de porit, hnii erze uje de hñimich uut pisht, hnii nos wir kuche yewo uje Porrosht shiyokōr ye pwelpe uje shuu Porrosht iim uje sahmūr eyok. Ìmeheeych uje Porrosht sahmūr eyok pork shuu eyok Irhīch Jesucristo toy hn ishi eyok hñitewihī dahir.

Porrosht chiihla israel oso.

9 ¹ Ye tokotiis Cristope heke erze uje titim olak ich ūru, ye tehnyēr olakpe. Porrosht Ichibich shuu peyuwo chiraha toy uje ich ūru ² uje yok dosdarakpa. Deeych hn dihlak shish peyucha pihnapso ich tukuuna. ³ Sehe tuu nos pihnapso omasaha par Porrosht aabo heke par yok ich ma om kimiji tikitokolihī Cristo ir hme hn tīfīr urhuta bahluta ehēt nehe kimiji uje tiyokōr tuu itsorz ich tuu nos pishibo hn nos pinime omasaha par Porrosht aabo. Erze pishibo uje titim olak wir pihnapse uje sehe tuu omasaha par Porrosht aabo. ⁴ Wir israel oso. Wir uje Porrosht chiihla ōr par ir aabo. Porrosht debuhu ōr ahīrkite, hn chibite lahwoso uje shish tyenij takashim ōr nehe. Porrosht ishim ōr erze ley uje Moisés chichewkite, hn Porrosht shuu oshuu loshipo par uje oteeychāha ire hn shish chibite lahwoso uje tyenij shuu Cristo tāra ōr. ⁵ Erze israel oso otāra uu ir porokkite Jacob ir aabo, hn Cristo tāra ōr ire. Wichi uje nos tibey erze kuchehe lekītiyo. Sehe tuu nos oteeychāha ire. Ich om uje oniyokōr oduhu ilorz.

⁶ Titim olak uje Porrosht ahwoso ye tata lekushiipe. Nos wir israel oso otāra ir porokkite Jacob uje iich yet otsii Israel, per Porrosht chibite shuu kinaha. Ire chibite uje shi nos wir uje ye olotiis irpe wir israel oso pisho, ⁷ hn nos wir uje otāra uu ōr porokkite Abraham, ye nos ōr israel oso pishope pork yewo otsotiis ire. Porrosht tatim Abrahamkite im: —Shi Isaac aabo wir uje tiihla ōr.— ⁸ Heke ich imeheeych, nos wir uje otāra

Abraham wir ye nos Porrosht aabo. Shi erze uje ye olotiis Porroshtpe wir uje Porrosht chibite lahwoso par shuu omasaha par ir aabo. ⁹Porrosht tatim Abraham lahwoskite shuu itsorz im: —Uje terihi ese äyt yet nehe hn takaashpo hn tuu pahwoso yakaha heke Sara ijit shūrha.— ¹⁰Ye shi erzepe uje Porrosht tata, per uje ehn eyok porokkite Isaac irāhta Rebeca hmiker ir aabo ōr arāho ¹¹hn uje ehn yahpaa erze ir aabo oshūrha ich ir aabo ye oniyokōrpe uje om hn uje mīhnik, per Porrosht chiihla nohmet heke shuu imeheeych uje shi chiihla uje sahmūr pork ye diihla ese uje shiyokōr kuchērk pork ye niyokōr latik. ¹²Heke tatim Rebeca im: —Ese eyjit webich osht tyenij shiyokōr ese eyjit shakaharc ir ibiyo nehe.— ¹³Porrosht ahwoso tata shuu itsorz im: —Tahmūr Jacob per tikitak Esaú.—

¹⁴¿Je om uje yiita uje Porrosht shiyokōr uje mīhnik? Ye ompe uje yiita yuhu itsorz ¹⁵pork Porrosht tatim Moisés im: —Tokosir erze uje sehe tokosir ōr hn tukuuna uje ich ōr losuhlaabo erze uje sehe tukuuna.— ¹⁶Heke Porrosht sosir erze uje ire sehe dosir ōr, hn ye niyokōrpe uje oso sehe oduhu niyokōr o kimiji oniyokōr kuchērk par uje sehe oduhu shiyokōr. ¹⁷Porrosht ahwoso tata uje tatim erze egipto oso ōr rey im: —Tibite owa par rey hn tiyokōr kucherkīhi owa par uje tibite orhōta uje pukurbo de par uje nos oso uje ode ĩrmo lekitiyo odiraha uje yok de hn otatehe yok lekitiyo.— ¹⁸Heke ich imeheeych uje Porrosht sosir erze uje sehe dosir ōr hn shuu wir ōr hu kata erze uje sehe duhu ōr hu kata. ¹⁹Heke atimlo yok on: —¿Īnaapo heke Porrosht sitak ōryok pork nīhyok yeēk pwele sontew uje Porrosht sehe niyokōr?— ²⁰Owa yeēkpo sham heke owāha Porrosht on: —¿Īnaapo heke ahakōr uhu itsorz?— Je om uje kobit je pwele chiihleh tatim ese uje shiyokōr ire im: —¿Īnaapo ahakōr yok uhu itsorz?— ²¹Ese uje shiyokōr ese kobit ire pwele shiyokōr uje ire sahmūr. Shiyehe wate katuta shiyokōr kobit uje ich ihīrtpa hn shiyokōr kobit yetpo par uje ochīra obiyo. ²²Kimiji Porrosht nahmūr ich pwele chibite orhōta uje ir ukurbo de hn ich sitak erze uje oshiyokōr mīhnūwo per shi ewenta ōr hn hneta ōr nehech otīr urhuta bahluta ehēt nehe ²³pork sehe duhu daabo odīrahapa uje ire ich dichpa hn chuuna uje ōr losuhlaabo hn sosir ōr hn nishii ōr par uje otīr ire ahir nehe. ²⁴Erze Porrosht aabo wir eyoklo, per ye shi eyokpe uje eyok israel oso. Wir dihipo kināho toy. ²⁵Porrosht ahwoso uje profeta Oseas lishi chichewkite tata shuu itsorz im: —Porrosht sole:

“Tiihla erze oso nehe uje ye tiihla ōr petikni, hn erze uje ye tahmūr ōr petikni ich tahmūr ōr nehe.” ²⁶Shiyehe erze oso uje Porrosht tatni im: “Ye tiihla olakpe,” deeych yet nehe hn oso otata uje wir ōr Porrosht aabo, Porrosht uje yelij nihna ire.— Wir uje Oseas chichewkite.

²⁷Profeta Isaías lishi eyucha erze israel osokite im: —Erze israel oso tyenij okīhniya nehe, shi ōr itso hñimich ukult uje de onoota bahluta

wirc, per wir shi sohmiramo uje tyenij otaachĩhi Porrosht ahir nehe, ²⁸pork uje terihi ese deeych nehe uje Porrosht sepyẽr erze oso uje ode nãhu ĩrmo shi itso uje ĩr ahwoso tata hn nos tyenij ĩr ahwoso yakaha shichish.— ²⁹Profeta Isaías lishi tat toy uje Porrosht tyenij sepyẽr őr nehe im: —Eyok ĩrhĩch ich ukurbo deyo de. Kimiji ye noymihi eyok nohmiramo par uje ye yiti ich shi eyok itso erze duwo Sodoma hn Gomorra oso uje Porrosht ye noymihi őr latik.—

Israel oso otsotiis Cristo.

³⁰Heke titim olak. ¿Yuhu inaapo uje itsorz? Erze uje ye őr israel osope wir ye odukwi Porroshtpe. Ele ahle ich ye olotiispe uje Porrosht shiyokõr par őr ire par uje őr owich de ire ahir, ³¹per erze israel oso ochukwi uje őr owich de Porrosht ahir heke őr prowa oshiyokõr erze ley uje Moisés chichewkite, per nĩhyok őr owich pork oyuwe erze ley. ³²¿Inaapo heke ye odishpe ese owich uje de Porrosht ahir? Shi otsotiis uje Jesucristo ishi őr hnitewihi Porrosht ahir, hn őr prowa oshiyokõr erze ley par uje sehe oduhu lawich chĩhi Porrosht ahir. Ye onahmũr Jesuspe, heke Jesús wichi shi itso kojach uje shuu őr hnite hn shuu őr kay. ³³Porrosht ahwoso tata shuu itsorz im: —Tĩbĩte kojach wahacha dĩt Jerusalén uje iich yet otsiĩ Sión par uje wichi shuu őr hnite hn shuu őr kay. Cristo wichi ese kojach. Uje ye olotiis ĩre ich ye opookpe uje otĩr ĩre ahir nehe pork őr owich dechi.—

10 ¹Pishibo watsaklo, ich tahmũrpa uje erze piħnapso israel oso omasaha par Porrosht aabo, heke shish yok orar tapur Porrosht par őr ire. ²Titim olak uje őr ire ich ochiyuhu ĩre uje oteeychãha Porrosht per ochimehi pork ye odirehepe uje Porrosht sahmũr. ³Ye odirehepe uje Porrosht shuu Cristo tirẽtkite par toy par ishi őr hnitewihi Porrosht ahir, heke őr prowa oshiyokõr erze ley par uje sehe oduhu Porrosht ehēt kiĩsihi őr ire. Ye Porrosht duhu őr owich chĩhi dahĩrpe pork otsotiis uje Jesús shiyokõrni par őr ire. ⁴Asa ley shuu ochĩraha uje oshiyokõr uje ich miħnũwo par uje ye duhu olotiis Jesucristope par uje ishi őr hnitewihi Porrosht ahir, heke nos wir uje ye olotiis ĩre ich őr owich de Porrosht ahir.

⁵Moisés chichewkite shuu itsorz im: —Yeẽk uje shiyokõr erze ley par uje shuu ĩr owich de Porrosht ahir ich ye ompe uje iyuwe erze ley.— ⁶Per erze uje ye olotiis uje Cristo ishi őr hnitewihi Porrosht ahĩrni yelij oduhu deyuwo tisĩr il: —¿Yeẽkpo tyenij tĩr poõrc?— Ochĩbĩte uje sehe oduhu yeẽk duhu Cristo sohnimich. ⁷Hn ye oduhu deyuwo tisĩr il: —¿Yeẽkpo iħnimich tĩr erze topo őr ichĩbiyo owich?— Ochĩbĩte uje sehe oduhu yeẽk diyuhu Cristo őr ahir. ⁸¿Őr ahwotiyoho uje shuu őr owich de Porrosht ahir? Erahalo erze ahwoso pork wir uje athĩlo hn uhulo olak eyuwo tisĩr, pork wir erze ahwoso uje tanimirãha titim erze oso kimiji ye olotiis

Cristo ich ishi òr hnitewihi Porrosht ahir. ⁹Tanimirãha tuu itsorz pork uje yeëk tata uje Jesús wichi ir Irhìch hn ye lotiis uje Porrosht shuu Cristo tokolihi erze topo òr ahirni ich ir owich de Porrosht ahir. ¹⁰Uje yeëk ye lotiis uje Jesús ishi ir hnitewihi Porrosht ahir ich Jesús ishi ir hnitewihi Porrosht ahir. Uje tatim yewo shuu itsorz ich ir owich de Porrosht ahir. ¹¹Porrosht ahwoso tata im: —Ese uje ye lotiis Cristope, uje taachìhi Cristo ahir nehe ich ye pookpe pork ir owich de.— ¹²Eyok Irhìch ye niyokörpe kinaha par erze israel oso hn niyokör kinaha par erze dihipo kinãho. Shuu nos òr itsye pork wichi uu nos oso òr yinsirc. Nos sosir erze uje otsapur ire. ¹³Porrosht ahwoso tata im: —Nos wir uje otsapur eyok Irhìch par uje wichi perdonar òr ich wichi ishi òr hnitewihi Porrosht ahir.—

¹⁴Kimiji oso olotiis ich ye òr pwelpe par uje otsapur Jesús par uje ishi òr hnitewihi Porrosht ahir. Uje yelij onunt uje Jesús ishi òr hnitew ich shish otsotiis pork ye odirehepe. Ich ye òr pwele uje onunt kimiji nihyok yeëk tatim òr uje Jesús ishi òr hnitew. ¹⁵Kimiji Porrosht ye duhu odo onanimirãha ir ahwoso ich ye òr pwel odope, per Porrosht shuu ohno pork ir ahwoso tata shuu itsorz im: —Ich ihìrtpa erze uje ohno hn otsanimirãha pahwoso otatim oso uje Cristo ishi òr hnitewihi pahir par uje shuu pehet kiisihì òr ire.— ¹⁶Per israel oso ich okihniya ode uje ochunt hn otsotiis uje Jesús ishi òr hnitew heke Isaías tatim Porroshtkite im: —Irhìche, nos otsotiis erze ahwoso uje titim òr ire.— ¹⁷Heke shì erze uje otër wir uje òr pwele ye olotiispe, hn wir shì òr pwele otër uje yeëk sanimirãha tatim òr uje Cristo shiyokör par òrkite.

¹⁸Titim olak, ¿je israel oso onunt uje Cristo shiyokör par òr ire? Ochunt pork Porrosht ahwoso tata shuu itsorz im: —Erze ir ahwoso ich nos chür ìrmo lekityo.— ¹⁹Titim olak, erze israel oso ¿je ye odirehepe? Titim olak wap uje Moisés tata uje Porrosht sole: —Tuu dihipo kinãho omasaha par paabo, heke olak israel oso abitilo òr. Tuu dihipo kinãho uje òr iluu mihñũ omasaha par paabo, heke olak israel oso tuu etaklo òr.— ²⁰Hn Isaías ye tola òrpe. Tatim òr im: —Porrosht sole: “Erze uje ye odukwi yok petikni ele ahle ich ochish yok, erze uje ye olapur par uje sehe odiraha yok petikni tuu ochiraha yok.”— ²¹Isaías tata im: —Porrosht sole: “Shish tokohirmi olak uje olak israel oso per olak ye ahakörlope uje yok tahmür hn shish uhu olak hu kata.”—

Porrosht chiihla israel oso.

11 ¹Ele ahle ich titim olak. ¿Je Porrosht noym erze israel oso uje chiihla òrkite? Ye noym òrpe pork yok israelya. Abraham hn ir ahnimich Benjamín wir uu yok poruwo wishì. ²Porrosht ye noym erze israel oso petikni. Uje ehn yahpaa niyokör irmökite ichii chiihla òr. Olak erahalo uje Porrosht ahwoso tata uje profeta Elías tatim Porroshtkite

uje sitak erze israel oso im: ³—Irhiche, erze israel oso oshuu uu profeta wishi oshuu otoy, hn otsehnimich erze altar uje oso oshuu loshipo hn otserũhu par uje oteeychãha owa. Shi yok nohmira uje yesh tikeeychãha owa hn sehe oduhu yok oduhu tikitĩ toy.— ⁴Per Porrosht tatim Elías im: —Ye shi owa sohmirape uje eeychãha yok. Hnakirbo ode ör syete mil uje tikibey ör. Ye olotsa lete nimohope erze kojano po uje iich otsii Baal par uje oteeychãha ochii ir porroshtihĩ.—

⁵Heke nehech ele ahle shish ode uje ye lotiis Porroshtpe. Wir uje chiihla örkite shi pork sehe diihla ör. ⁶Uje Porrosht chiihla oso par uje ishimihĩ ör owich uje de ire ahir, ich ye latik pwele dish obiyo par uje serz owich Porrosht ahir, pork serz kinaha hn ishimihĩ kinaha, ye ilyepe. ⁷¿Latikpo uje tokolihi erze israel oso? Ye odish lawichihĩ Porrosht ahirpe pork onaha, per erze uje Porrosht chiihla örkite wir uje ochiyey pork ör owich de Porrosht ahir. Erze yewo uje ye Porrosht diihla örpe ye onahmür oniyokörpe uje Porrosht sahmür heke Porrosht shuu ör hu kata. ⁸Porrosht ahwoso tata shuu itsorz im: —Porrosht shuu itso uje öhyok kuhirt, heke uje oteychim ichii ye onomope, hn uje ochunt ich ye odirehepe. Nehech ele ahle ich shish itsorz.—

⁹Rey David lishĩ tatim Porroshtkite im: —Sehe tuu uhu wir ör ahamich tokole shi itso trampta uje chishew ör, hn uhu wir shi itso trampta par uje shiyeru ör, hn uhu wir shi itso kojach uje shuu ör hnite hn shuu ör kay par uje oshi labahat pork oshiyokör uje ich mihnũwo. ¹⁰Uhu wir ör ilo olibo par uje ye ör pwele onomo asa trampta, hn shish uhu ör ibiyo nēhi ör par uje ör narhak.— Wir uje rey David tatkite.

Dihipo kinãho omasaha par Porrosht aabo.

¹¹Heke titim olak. Erze israel oso wir shi itso uje kojach shuu ör hnite hn shuu ör kay pork otsotiiis Cristo. ¿Je ye ör pwele otsehetpe pork ör ire ochimehi? Wir ör pwele oyehet. Uje erze israel oso ochimehi ich erze dihipo kinãho omasaha par Porrosht aabo par uje oshuu erze israel oso opota ör ire. ¹²Uje ör ire ochimehi ich oshuu dihipo kinãho ör itso ihĩr deyo pork ör owich de Porrosht ahir. Heke uje erze israel oso omasaha par Porrosht aabo nehe ich tyenij tokole itso uje erze dihip kinãho ich ma ör ihĩr deyo.

¹³Kuchit de uje sehe titim olak uje olak dihipo kinãho. Porrosht chibite yok par yok apóstol par uje titĩr erze dihipo kinãho. Shish yok narim pibiyoho ¹⁴erze pihnapso israel oso ör ile ikich par tuu opota erze dihipo kinãho par uje nohmĩramo omasaha par Porrosht aabo toy. ¹⁵Uje erze israel oso ochimehi ich Porrosht iim ör, heke erze dihip kinãho omasaha par Porrosht aabo. Uje erze israel oso omasaha par Porrosht aabo nehe ich shi itso uje ör ikpo. ¹⁶Titim olak shi titeēta. Erze trigo ee uje webich oso ich ochekushu hn oshiyokör pan hn oshimihĩ Porrosht heke ich om

hn shuu ese erint ir masta uje pan tāra ich om toy. Ese uje titeēta wir shi itso israel poruwo wishi uje ōr webich oso uje Porrosht chiihla ōrkite heke Porrosht chiihla erze israel oso uje otāra ōr. Titeēta erze israel oso toy. Kimiji odosimihi Porrosht erze pohir uro pork ich om heke erze ir uke ich om toy.

¹⁷Erze israel oso nohmiramō wir shi ōr itso erze pohir uke uje iich otsii olivo uje ich ihār, hn olak uje olak dihipo kināho shi olak itso asa pohorrza uke uje ich otsii olivo uje de hmōnt ehēt. Uje amsahalo par olak Porrosht aabo ich shi itso uje yeēk chobirho asa pohorrza uke sohmireme waa je ich om. Chekshehe asa pohorrza uke sohmireme uje de hmōnt ehēt toy. Chichyēr asa pohorrza uke asa pohorrza waa je ich om heke asa pohorrza ir isho masaha erze uke ahle. Asa pohorrza uke ahle wir olak pork amsahalo israel oso ōr owich hn erze om uje Porrosht shiyokōr wir par olak. ¹⁸Ye ompe uje olak narim olak pork amsahalo erze israel oso ōr owich shi olak itso pohorrza uke uje ochichyēr. Kimiji olak narim olak ich tyenij olak eyucha uje erze isho ye tāra olakpe par uje ye duhu olak uro kakope. Erze isho shi tāra erze uro heke ye duhu olak kakope. ¹⁹Kimiji atimlo yet on: —Ochekshehe erze uke par uje yomsaha owich.— ²⁰Ich ūru uje ochekshehe erze uke hn amsahalo owich. Ochekshehe erze uke pork ye ompe. Wir shi itso erze israel oso uje otsotiis Cristo. Shi pork ye otiislo Cristope heke olak itso erze uke uje ochichyēr, heke ich ye ompe uje olak narim olak. Shi tyenij atililo Porrosht. ²¹Porrosht ye narhak erze ukepe pork wir shi itso erze israel oso uje otsotiis Cristo. Kimiji otiislo ire ich olak itso ōr toy, Porrosht tyenij ye narhak olak petik nehe. ²²Hmeychimlo, ode uje shish Porrosht sosir ōr hn ode toy uje tyenij sepyēr ōr nehe. Sepyēr erze uje otsotiis ire per sosir olak kimiji shish ye otiislo irpe. Per kimiji otiislo ire ich shi olak itso pohir uke uje ochekshehe oshuu kay. ²³Kimiji erze israel oso onoym deluu hn ye olotiis Porrosht ich Porrosht shuu ocheeshpo omasaha ese ir uke owich. Porrosht ukurbo deyo de heke pwele shuu wate pohorrza uke masaha lawichpo. ²⁴Olak uje ye olak israel osope, shi olak itso asa pohorrza uke uje iich otsii olivo uje de hmōnt ehēt. Ich kwestpa par uje ochichyēr asa pohorrza uke uje tāra hmōnt ehēt hōr asa pohorrza waa je ich om. Uje shiyehe wate pohorrza uje ochichyēr ich wantak pork shiyehe wate pohorrza uke.

Uje ich uhurc nehe hn Israel oso omasaha par Porrosht aabo toy.

²⁵Pishibo watsaklo, sehe tuu erahalpa par uje ye olak narim olak hn ebitlo uje olak ma om je erze yewo. Sehe tuu erahalo uje Porrosht sehe niyokōr par erze israel oso nehe uje ye oso yewo odirehepe. Porrosht shuu erze israel oso okihniya ōr hu kata nehech terihī ese deeych nehe uje nos dihipo kināho uje Porrosht chiihla ōrkite omasaha par ir aabo. ²⁶Uje ich uhurc ich nos wir israel oso tyenij omasaha par Porrosht aabo

toy pork Porrosht ahwoso tata shuu itsorz im: —Ese yet uje sosir erze israel oso tyenij tokolihi ese dit Si6n hn chiyuhu erze uje ye onahm6r Porroshtpe. Wir israel oso pork ot6ra Jacob lishi.— ²⁷Hn profet yet tata uje Porrosht sole: —Tibite pahwoso titim 6r uje tyenij yok perdonar erze kuche mihnuwo uje oshiyok6r.— Wir erze uje Porrosht ahwoso tata.

²⁸Erze israel oso otsotiis uje Jes6s ishi 6r hnitewihi Porrosht ahir heke ochii Porrosht nam6ha, per olak uje olak dihipo kin6ho ich tokole om par olak pork amsahalo par olak Porrosht aabo. Per Porrosht yesh sahm6r erze israel oso pork chiihla 6r hn chibite lahwoso uje tatim uu 6r poruwo wishkite. ²⁹Erze uje Porrosht ishim yelij nesira, hn erze uje Porrosht chiihla 6r yelij noym 6r. ³⁰Wapkite olak uje ye olak israel osope ich ye ahak6rlope uje Porrosht sahm6r, per ele ahle wichi sosir olak pork erze israel oso ye oniyok6rpe uje wichi sahm6r. ³¹Ele ahle erze israel oso ye oniyok6rpe uje Porrosht sahm6r shi 6r itso olak uje wapkite hn ye ahak6rlope uje Porrosht sahm6r, heke Porrosht sosir olak par uje deeych yet nehe hn sosir 6r toy. ³²Porrosht chibite orh6ta uje nos oso oshiyok6r uje ich mihnuwo, heke sehe nos dosir 6r pork shuu Cristo toho 6r.

³³Porrosht ich ma eykdeyo, hn nos chiraha erze kuche. Nihyok uje ye6k eyuwo itso ire pork uje tata kuche ich nos chiyey, hn nihyok uje ye6k nos chiraha uje Porrosht shiyok6r. ³⁴Ye6kpo uje chiraha eyok irhich eyuwo? Nihyok. Ye6kpo uje sakit ire? Nihyok. ³⁵Ye6kpo uje ishim Porrosht kuche heke shuu ir hnitew de ire? Nihyok.

³⁶Heke ich imeheeych uje Porrosht ich dich pork Porrosht shiyok6r nos wir kuche uje de, hn nos tibey. Nos wir uje ire shiyok6rkite wir par shuu ire ich dich. Sehe tuu nos oso shish oteeych6ha Porrosht. Uje oniyok6r oduhu ilorz ich ihirtpa.

Tyenij oshiyok6r uje Porrosht sahm6r.

12 ¹Pishibo watsaklo, heke titim olak. Porrosht sosir eyok shuu itsorz heke tyenij asimihilo olak ire uje yesh olak ika. Enahalo olak par uje shi ahak6rlo uje ire sahm6r. Heke olak shi par ire par uje eeych6halo ire. Porrosht sahm6r uje ahak6rlo uhulo itsorz. ²Ye uhu olak iluu ilo erze uje ye odiraha Porroshtpe. Enshii olak eyuwo par uje olak iluu tokole ich om. Uje ahak6rlo uhulo itsorz ich imeheeych uje Porrosht sehe duhu ahak6rlo, heke erahalo uje ich om hn erahalo uje Porrosht sahm6r.

³Porrosht ishim yok pibich uje ich dich heke yok pwele titim olak ye6k. Ye ompe uje ire narim ire hn duhu deyuwo tisir uje ire ich ma dich hn iyuwe uje Porrosht chibite ire. Porrosht shuu ditik par shiyok6r debiyo pork ye lotiis irpe. Shi tyenij shuu deyuwo tisir6hi debiyo heke ye duhu ire ma losuhlaap o kimiji duhu ire ma dich. ⁴Kal eyok nohmira ir yuhurra shi nohmira per ir ikiyo ich kihniya. Ye ir ikiyo ilyepe. ⁵Shi eyok itso

Cristo ir yūhurrza hn ir ikiyo pork eyok ich eyok kihniya per shi eyok weeta nohmira itso ir yūhurrza. ⁶Porrosht nos ishim eyoklo ibiyo shuu kināho kināho, ye duhu ilyepe. Ishim eyok debiyo uje sehe duhu yiyokōr. Kimiji dosim eyok yeēk par uje sanimirāha ir ahwoso ich ye sowe uje Porrosht ahwoso tata. ⁷Kimiji Porrosht dībite yeēk par diákono uje nishii iglesya ich nos shiyokōr debiyo shuu tokole om. Kimiji Porrosht dosim yeēk par uje shiyokorāha ōr ich tyenij shiyokorāha ōr. ⁸Kimiji Porrosht dosim yeēk erze obiyo par uje duhu yewo oduurapo ich tyenij sakit ōr. Kimiji Porrosht dosim yeēk kuche par uje ishimihī yewo ich ye narhak, dosim ōr. Kimiji Porrosht dosim yeēk par uje tibey Porrosht aabo uje ochish obiyo o oteeychāha Porrosht ich tyenij chībite ire par uje takashim ōr. Kimiji Porrosht dosim yeēk erze obiyo par uje sosir erze uje ōr permo, hn erze uje ōr dosdarak hn erze uje ōr losuhlaabo ich tyenij ire ayła uje takashim ōr.

Porrosht aabo tyenij otsahmūrye.

⁹Titim olak. Ich uhulo ūrpa uje ahmūrloye, per etaklopa ahakōrlo erze mihñūwo, hn shish ahakōrlo erze uje ich om. ¹⁰Ahmūrlo erze Porrosht aabo yewo pork wir olak leshībo, hn shish olak narim ōr uhulo ilo uje ich ōr deyo. ¹¹Ye uhulo patim olak. Ye uhulo olak towo, per shish emitlo olak par ahakōrlo eyok Irhīch ir ibiyo. ¹²Shish tyenij olak ayła pork erahalo uje olak owich de Porrosht ahir, hn shish tyenij olak ewenta erze kuche mihñūwo uje tīr olak. Shish tyenij olak orar apurlo Porrosht. ¹³Akashimlo erze Porrosht aabo yewo uje kuche nihyokīhi ōr ahir. Kimiji Porrosht aap tāra dukuhla hn tekirihi olak yeēk ich uhulo taakihi ahuch. Kimiji nihyok uje umuhu ich uhulo umuhu ahuch. ¹⁴Eyuhulo olak ahwoso oomoho erze uje oloter olak, ye ajīrlo ōr ikiyo. ¹⁵Uje yeēk ayła ich tyenij olak aylihi ire toy. Uje yeēk yerh ich olak tyenij eyerhlo toy. ¹⁶Nos olak uje olak Porrosht aabo ich tyenij uhulo olak eyuwo ilye, hn ye olak narim olak. Ye ebitlo uhu olak ma deyo je erze losuhlaabo pork nos olak itsye, hn ye uhulo olak ilo uje olak ma dītuwo je erze yewo. ¹⁷Uje yeēk niyokōr mihñikīhi olak ich ye eyuhulo olak bahat. Shi ahakōrlo uje nos oso ochiraha uje ich om. ¹⁸Kimiji yeēk dītak olak yeēk ich tyenij uhulo ire ehēt kiis par uje olak aho kiisihye. Kimiji wichi ye nahmūrpe ich shi ire. ¹⁹Pishībo watsaklo, uje oniyokōr mihñikīhi olak ich ye eyuhulo olak bahat. Shi moymihilo Porrosht hme par uje ire nishii hn sepyēr ōr, pork ir ahwoso tata shuu itsorz im: —Eyok Irhīch sole: “Uje yeēk niyokōr mihñikīhi olak ich yok tyenij tiyuhu olak bahat.”— ²⁰Wir uje tyenij ahakōrlo. Kimiji sewit nēhi olak imehēt asimlo kuchērک par tew hn uje iich nēhi asimlo awit uhulo doho. Uje ahakōrlo uhulo itsorz ich tyenij shuu wichi pook pork shi ahakōrlo omīhi ire. ²¹Ye eyuhulo olak bahat hn uhulo erze kuche mihñūwo derz olak. Shi tyenij ahakōrlo omīhi erze uje oshiyokōr mihñikīhi olak heke erzlo erze mihñūwo.

13 ¹Nos wir oso tyenij oshiyokōr uje gobierno hn ōr bahluwo otatim ōr. Shi Porrosht wichi uje chibite par nos oso ōr bahluwo ode hn chiihla yeniipo uje omasaha par ōr bahluwo. ²Heke erze uje otsitak uje ōr bahluwo ode ich otsitak erze uje Porrosht chibite. Uje ye oniyokōrpe uje ōr bahluwo otatim ōr ich erze ōr bahluwo tyenij otsepyēr ōr. ³Erze ōr bahluwo ye ochihipē par uje oshuu wir otola ōr ire erze uje oshiyokōr uje ich om. Erze ōr bahluwo ode shi par uje oshuu wir otola ōr ire erze uje oshiyokōr uje ich mihñūwo. Kimiji ye ahmūrlo uje erze ōr bahluwo otsepyēr olak ich tyenij ahakōrlo uje ich om. Uje ahakōrlo uje ich om uhulo itsorz ich erze ōr bahluwo otsahmūr olak. ⁴Porrosht chibite erze ōr bahluwo par uje oshiyokōrīhi olak uje ich om, per kimiji ahakōrlo uje ich mihñūwo ich tyenij atililo ōr. Ōr ukurbo de pork Porrosht chibite ōr par uje otsepyēr erze uje oshiyokōr uje ich mihñūwo. ⁵Heke tyenij ahakōrlo uje olak bahluwo otatim olak par uje ye Porrosht duhu olepyēr olak, hn par uje eenilo uje ahakōrlo uje mihñūwo. ⁶Eshilo gobierno uje ley tata pork Porrosht chibite erze ōr bahluwo par oshiyokōr erze obiyo uje titim olakike. ⁷Erze uje ōr ibiyo shi par ōr kobra hnote par gobierno ich tyenij eshilo ōr uje ley tata, hn uje eyuhu hute ich eshilo ire pork ley chibite shuu itsorz. Tyenij atililo erze ōr bahluwo.

⁸Ye ahakōrlo olak hñitewīhi yeēk. Ese uje shi itso hñitewta uje de Porrosht aabo wichi uje tyenij otsahmūrye, pork yeēk uje sahmūr yewo ich nos shiyokōr uje Porrosht ley tata. ⁹Porrosht ahwoso tata uje ir ley tata shuu itsorz im: —Ye orāha erāhta, hn ye orāha abich, hn ye tuk yewo uhu otoy, hn ye ohir. Ye abita kuche.— Erze ley hn erze yēr wir shi itso erze ahwoso uje tata im: —Ahmūr yewo uhu itso owa uje ahmūr owa.— ¹⁰Uje yeēk sahmūr yet ich yelij shiyokōr mihñikīhi ire, heke shi itso uje shiyokōr uje Porrosht ir ley tata.

¹¹Kuchit yet de uje tyenij ahakōrlo toy. Ich osdeyo uje yomsahaloni par eyok Porrosht aabo per ele ahle yej terihi ishirit uje Cristo cheeshpo par hnoy eyok nehe. Ese deeych uje cheeshpo nehe ich yej terihi je uje yomsahaloni par eyok Porrosht aabo, heke ich ye ompe uje olak shi itso uje amilo hn ye ahakōrlo ir ibiyo. Heke tyenij erihilo par uje ahakōrlo ir ibiyo. ¹²Ich yej terihi uje sihna ire ese ishirit uje oso oshiyokōr uje ich mihñūwo shi itso uje yej deychole uje Cristo cheeshpo nehe, heke tyenij moymlō erze kuche mihñūwo uje ahakōrlo pork wir shi itso uje dihlak. Ahakōrlo uje ich om uje Porrosht sahmūr pork uje ahakōrlo uje ich om ich olak shi itso luu. Uhu olak ilo ohyerptosht uje chimit ire par uje oteye. ¹³Olak shi olak itso uje deeych heke tyenij ahakōrlo uje Porrosht sahmūr. Ye ompe uje etirlo ōr ahamich uje ich mihñik, hñii uje uhulo yikich sēhi olak, hñii ye ahakōrlo erze kuche mihñūwo uje hñakirbo hn timcher oshiyokōrīhiye. Ye ompe uje ahakosloye, hn ye abitilo kuche. ¹⁴Shi tyenij uhu olak iluu ilo eyok Irhich Jesucristo ir iluuta. Ye emitlo olak par uje ahakōrlo erze olak iluu iler uje moymloni.

Ich ye ompe ochish majamichihiye.

14 ¹Tyenij olak ayla uje yeëk tekirihi olak uje Porrosht aap uje yērij dīraha Porrosht ahwoso. Uje ire eyuwo tisīr kinaha, ye ilo uje olak eyuwo tisīr hn ye Porrosht ahwoso tata latik ich ye ahakoslo ire. ²Shi titeēta kimiji yeëk dīraha uje nos wir oposo ich om par otew, per yet de uje ye dīrehepe heke shi tew jōro. ³Ese uje nos tew erze kuche ye ompe uje chibite uje wichi ye jukur ese uje ye tepe, hn ese uje ye tew erze kuchepe ich ye ompe uje chish majamichihi ese uje tew. Ese uje tew erze ēro hn ese uje ye tepe wir Porrosht aabo hn Porrosht sahmūr ōr. ⁴¿Owa yeëkpo par uje ata uje ich mīhnik ese yet ir ibich? Porrosht wichi uu ir Yinsirc, ye owape. Porrosht wichi uje tyenij tatim kimiji om uje shiyokōr o kimiji ye ompe, heke tyenij shiyokōr uje ich om pork eyok Irhīch ukurbo deyo de par uje takashim wichi.

⁵De uje shuu deyuwo tisīr ese deeych nohmet hn shuu ma dich par teeychāha Porrosht je uu daalo yewo, hn yet de uje shuu erze daalo nos itsye. Kal nohmīr shi tyenij shuu deyuwo tisīr uje ich om par ire kimiji diihla deeych nohmet ich ma dich o kimiji nos diihla, hn ye ompe uje koswāha. ⁶Wir ōr itsye, ochiihla uje ōr ire otsahmūr par uje oteeychāha Porrosht, heke ich oshuu eyok Irhīch ich dich erze daalo. Itso ese uje nos tew erze kuche pork shuu eyok Irhīch ich dich hn nīna Porrosht. Ese yet uje ye tew ērope ich ye tepe heke shuu eyok Irhīch ich dich toy, hn nīna Porrosht toy. ⁷Heke ich nīhyok eyok yeëk uje pwele shiyokōr shuu itso uje ire sahmūr pork uje ehn ika ich shish tyenij shuu Porrosht dich hn uje terihi ese deeych uje toy ich shish shuu Porrosht dich. ⁸Uje yesh eyok ika hn uje yiti shish tyenij yiyokōrlo uje eyok Irhīch sahmūr. Heke shish yishew eyok Irhīch ir ibiyo uje yesh eyok ika hn uje yiti, ⁹pork Cristo tokite hn ikpo par uje wichi masaha par uu topo ōr Irhīch hn erze uje ōr ika toy.

¹⁰Heke titim olak yeëk. ¿Inaapo heke chish majamichihi Porrosht aap yet pork wichi leshap? Hn olak yet itspo ¿inaapo heke chibite uje wichi ye jukur pork wichi leshap toy? Deeych yet nehe hn nos yitīrlo Porrosht ile ikich ese owich uje teychim oso kimiji oniyokōr uje mīhnik o kimiji oniyokōr uje ich om. ¹¹Porrosht ahwoso tata uje eyok Irhīch sole: —Ich ūru uje shish yok ika hn ich ūru toy uje tyenij nos ocha dete hnīmoho pikich hn nos oteeychāha yok nehe otata uje yok ich dich.— Wir uje Porrosht ahwoso tata, ¹²heke kal eyok nohmīr nohmīr tyenij nos yitim Porrosht uje yiyokōrloni.

¹³Tyenij yukwim uje yishlo majamichihiye pork nos tyenij yitim Porrosht uje yiyokōrloni yuhu ilorz nehe. Ma om yibite uje ye yiyokōrlo kuchērk uje shuu eyok leshibich shiyokōr uje ich mīhnik. Uje yuhulo shiyokōr uje mīhnik ich shi itso uje yibite kojach ijich par uje shuu

hnite shuu kay. ¹⁴Tikiraha erze uje ye olotiis eyok İrhıch Jesuspe ich om par otew nos wir oposo. Wir om per par ire uje shuu deyuwo tisır uje Porrosht ye nahmūr uje ir tew ich mihñūwo par ire tew. Shi shuu itso uje Porrosht ahwoso ye jukur. ¹⁵Uje eshibich shuu deyuwo tisır uje Porrosht ye nahmūr uje tew erze kuche hn teychim owa uje ew heke tew toy ich shiyokör uje mihnik. Uhu eshibich tew heke ich ye ahmūr wichpe. Ye owa eshibich uje ew erze uje shuu ire shiyokör uje mihnik. Cristo tooho krus eeych par uje ishi eshibich ir hñitew toy. ¹⁶Erze oposo uje eraha uje ich om per yewo oshuu deyuwo tisır uje ich mihñūwo, ye ew par uje ye odish majamichihi owa. ¹⁷Par Porrosht aabo ich om par otaak hn oho ye latikish, per ich ma ihırtpa par ör ire uje tyenij oshiyokör uje ich om hn oshuu laho kiis hn ör ayla pork Porrosht İchibich de ör aho.

¹⁸Erze uje oshiyokör Cristo ir ibiyo oshuu itsorz ich Porrosht sahmūr uje oshiyokör hn nos wir oso otsahmūr toy, ¹⁹heke tyenij yiyokorıhiye erze uje shuu eyok aho kiis hn yakashimloye yuhu eyok iluu ma itso Cristo ir iluuta. ²⁰Ye ompe uje uhu Porrosht ibiyo tokole uje ye jukur shi pork sehe ew erze kuche. Ich ũru uje nos wir oposo ich om par uje otew, per kimiji ew erze uje shuu eshibich shiyokör uje mihnik ich ahakör uje mihnik. ²¹Kimiji eshibich teychim owa uje ew erze kuche ěro hn tew toy per ir eyuwo tisır uje ye Porrosht nahmūrpe, ich uhu shiyokör uje ich mihnik. Ma om uje ye ew erze kuche ěro hn ye ehe erze wino hn ye ahakör kuche yewo uje shuu eshibich shiyokör uje ich mihnik. ²²Owa eraha erze kuche uje ich nos om par uje ahakör hn par ew hn ehe. Porrosht chiraha uje ye mihnikpe par ahakör, per ye uhu erze yewo oniyokör pork wir ye odirehepe. Ese uje ye duhu leshibich niyokörpe uje ich mihnik shuu itsorz ich ayla pork ehethuuna uje ye niyokörpe uje mihnik. ²³Per ese uje koswaha pork ye direhepe kimiji om o kimiji ye ompe par uje tew erze kuche wichi shiyokör uje mihnik uje tew pork ir eyuwo tisır uje shiyokör uje ye Porrosht nahmūrpe, per shiyokör. Nos wir kuche uje yeek shuu deyuwo tisır uje Porrosht ye nahmūrpe, uje shiyokör ich shiyokör mihnik.

Porrosht aabo tyenij otakashimye.

15 ¹Eyok uje yiraha uje Porrosht ahwoso tata ich ye ompe uje shi yiyokör uje yahmūr. Tyenij eyok ewenta erze uje yerij odırhapa Porrosht ahwoso heke ör koswaha hn ochimehi. ²Tyenij yakashim erze uje yerij odıraha Porrosht ahwoso par uje ma ye olotiis ire. Wichi ich om par ör ire. ³Cristo ye niyokörpe uje shi ire sahmūr per shish shiyokör uje Porrosht sahmūr. Porrosht ahwoso tata uje Cristo tatim Porroshtkite shuu itsorz im: —Erze uje ochiyuhu lahwoso mihnuwōho owa ich ochiyuhu lahwoso mihnuwōho yok toy.— ⁴Nos wir Porrosht ahwoso uje profeta poruwo wishi ochichewkite wir par shiyokoraha eyok par uje yiraha heke

eyok ewenta erze kuch mihnūwo uje tĩr eyok hn yiraha uje eyok owich de Porrosht ahir. ⁵Porrosht wichi uje shuu eyok ewenta erze kuche uje tĩr eyok hn shuu eyok aho kiis. Sehe tuu Porrosht duhu olak eyuwo ilye ilo Cristo uje hōr Deych ōr eyuwo itsye ⁶par uje nos eeychāhalo Porrosht uu eyok Irhīch Jesucristo ir Deych pork ich nos olak eyuwo itsye.

Dhipo kināho ochunt Cristo toy.

⁷Tyenij olak ayla uje wir ōya olak erze Porrosht aabo uje yērij odiraha Porrosht shi itso uje Cristo ayla uje amsahalo par olak Porrosht aabo par uje uhulo Porrosht dich. ⁸Titim olak uje Cristo tirētni par uje takashim erze israel oso par uje sowa ōr uje Porrosht ahwoso ich ūru uje chibite tatim eyok poruwo wishkite pork Cristo shuu Porrosht ahwoso yakaha uje tatim ōr. ⁹Tirēt toy par uje takashim erze dhipo kināho par uje wir onina Porrosht uje sosir ōrkite pork ir ahwoso tata shuu itsorz im: — Cristo tatim Porrosht im: “Tyenij tikeeychāha owa uje yok dechi dhipo kināho ōr etet, hn tikeeychi teēt imno par owa nehe.”— ¹⁰Porrosht ahwoso tatpo tatim erze dhipo kināhokite im: —Uhu olak ayla hōr wir israel oso.— ¹¹Hn Porrosht ahwoso tatpo shuu itsorz im: —Olak uje olak dhipo kināho, nos eeychāhalo olak Irhīch, hn sehe duhu nos oso oteeychāha ire.— ¹²Profeta Isaías tatkite im: —Cristo tyenij tirēt nehe. Wichi tyenij tāra Isaí lishi uu rey David lishi ir deych. Ese Cristo tyenij tibey erze dhipo kināho nehe, heke erze dhipo kināho ochiraha uje ōr owich de Porrosht ahir pork ye olotiis Cristope.— Wir uje Porrosht ahwoso tata. ¹³Porrosht wichi uje shuu erahalo uje olak owich de ire ahir. Sehe tuu Porrosht duhu nos olak ayla hn duhu olak aho kiis pork ye otiislo irpe. Uje Porrosht niyokōr duhu ilorz ich ir Ichibich shuu erahalo uje ich ūru uje olak owich de Porrosht ahir.

¹⁴Pishibo watsaklo, ye tokotiispe uje olak ile om. Tibite uje nos erahalo ahakōrlo uje Porrosht sahmūr hn erahalo uje akitloye. ¹⁵Erze ahwoso uje tuu ochichew ochibite asa hutita ich meytii doso uje titim olak hn par uje olak eyucha pork Porrosht chibite yok erze pibiyo par uje titim olak tuu itsorz. ¹⁶Yok Jesucristo ir ibik par uje titim erze dhipo kināho ir ahwoso. Erze Porrosht ibiyo uje ishim yok par tiyokōr wir uje titim ōr uje Jesucristo ishi ōr hnitewihi Porrosht ahirkite. Heke yok shi itso israel oso ōr saserdote uje oshim Porrosht loshipo armistakite hn erze dhipo kināho uje titim ōr Cristo wir shi ōr itso erze loshipo uje tokosimihi Porrosht. Wichi uje Porrosht ich sahmūrpa uje tiyokorāha erze dhipo kināho pork Porrosht Ichibich nishii ōr.

¹⁷Yok narim Jesucristo pork shuu pibiyo tokole ich om uje Porrosht ishim yok par uje tiyokōr. ¹⁸Shi tiita uje Cristo shiyokōrni pork wichi uje shuu pibiyo tokole ich om. Uje titim erze dhipo kināho tuu itsorz hn uje omo uje tiyokōr ich ye olotiis irpe hn oshiyokōr uje Porrosht ahwoso

tata. ¹⁹Porrosht Ichibich ich ukurbo deyo de. Wichí uje takashim yok par uje shuu tiyokōr erze kuche uje ye latik pwele shiyokōr par uje ye olotiis Cristope. Heke titim erze dit Jerusalén oso hn nos wir oso yewo uje ode lekityo nehech takaachīhi ese hñimich Iliria titim ōr uje Jesucristo ishi ōr hñitewihi Porrosht ahirkite, ²⁰pork tibite uje shi titir erze oso uje ye odiraha uje Cristo ishi ōr hñitewihi Porrosht ahirkite. Ye titir erze hñimope uje yewo otsanimirāha ir ahwosni pork wir ich ye pibiyope. ²¹Porrosht ahwoso tata shuu itsorz im: —Erze uje ye odiraha Cristope wir uje tyenij ochiraha nehe. Erze uje yelij onunt uje Cristo shiyokōrkite par ōr ire wir uje tyenij ochiraha nehe.—

Pablo sehe do tīr dit Roma.

²²Heke titim olak. Nīhyok ye yok tyempīrsh petikni par uje tekirihi olak, ²³per ele ahle ich nos tihna pibiyoho lika, hn ich osdeyo uje sehe takaha tekirihi olakni, ²⁴heke sehe tekirihi olak wap uje olak de dehet pehet uje takaha titir España nehe. Uje takaachīhi olak ahir nehe hn tiyakaha olak ahir tuu pikaap ich sehe tuu akashimlo yok uje titir ese hñimich España.

²⁵Wap sehe takaha titir Jerusalén. Takahii hnote par tokosim erze Porrosht aabo uje odechi, ²⁶pork erze Porrosht aabo uje ode erze hñimo Macedonia hn Acaya otakisho deyuwo hn ochibite hnote par otakashim erze Porrosht aabo uje ōr losuhlaabo uje odechi dit Jerusalén. ²⁷Wir ich ōr ayla uje otakashim erze Porrosht aabo uje ōr losuhlaabo. Erze uje ich om uje Porrosht ishimihī erze israel oso uje shuu Cristo ishi ōr hñitewihi dahir ich tīr erze dihipo kināho toy, heke ich om uje erze dihipo kināho oshuu cheeshi otakashim erze israel oso toy. ²⁸Uje tokosim erze hnote erze Porrosht aabo nehe uje Porrosht aabo yewo oshim ōr ich sehe takaha titir España. Sehe tiyakaha olak ahir wap ese dehet pehet. ²⁹Tikiraha uje tekirihi olak nehe ich Cristo shuu tokole uje ich ompa.

³⁰Pishibo watsaklo, shi pork Jesucristo wichí uu eyok Irhīch hn pork Porrosht Ichibich shuu yahmūrloye ich tapur olak par uje enaha olak par uje eyok orar yapurlo Porrosht par yok. ³¹Yapurlo Porrosht par uje ye wir odishew yok hn oduhu yok oduhu tikiti erze israel oso uje odechi hñimich Judea uje otsotiis Cristo. Apurlo Porrosht toy par uje erze ir aabo uje ode Jerusalén ich onahmūr erze hnote uje tāra erze dihipo kināho uje tokōhwa par tokosim ōr, ³²heke kimiji Porrosht nahmūr uje takaachīhi olak ahir nehe ich yok ayipa hn tahmūrpa tekirihi olak. ³³Sehe tuu Porrosht uje shuu oso ōr aho kiis takashim olak. Ich ihīrtpa uje itsorz.

Pablo ishim Porrosht aabo ōr saludo.

16 ¹Sehe tuu erahalo uje Febe wate eyok nanap. Wate Porrosht aap hn dyakinyarīhichis ese dit Cencrea. ²Sehe tuu olak ayla uje wate

taachĩhi olak ahir nehe pork ich om uje nos akashimlo Porrosht aabo hn wate eyok Irhĩch ir aap. Uje kuchẽrk nihyokĩhi ahir ich akashimlo wate pork wate shish takashim Porrosht aabo hn takashim yok toy.

³Tokosim Prisca hn Aquila õr saludo. Wir pihyẽro uje oshiyokõr Jesucristo ir ibiyo itso yok. ⁴Wir otakashim yokni par uje ye erze yewo oduhu yok oduhu tikitĩ nehech sehe oduhu õr toy. Ye shi yokpe uje tikina õr, nos wir Porrosht aabo uje otakisho lawichĩhi lekitiyo uje õr dihipo kinãho onina õr toy. ⁵Tokosim saludo erze Porrosht aabo uje otakisho lawichĩhi Prisca hn Aquila õr ihyuch. Tokosim saludo Epeneto. Wichĩ ich tahmũr. Wichĩ webich os uje ye lotiis Cristope uje dechi hnimich Asia. ⁶Tokosim María saludo. Wate shish shiyokõr Cristo ir ibiyoho olak ahir. ⁷Tokosim saludo Andrónico hn Junias. Wir pihnapso uje ode pahir karsel ehetni. Wir apóstole uje oshiyokõr debiyo ich otsihnew. Uje ehn yahpaa tomsahani par yok Porrosht aap ichii õr ire omasaha par Porrosht aabo. ⁸Tokosim saludo Ampliato toy. Tahmũr ire pork ye lotiis eyok Irhĩchpe. ⁹Tokosim saludo Urbano. Wichĩ ñya yokni uje oyiyokõr Cristo ir ibiyo. Tokosim saludo Estaquis. Ich tahmũr ire. ¹⁰Tokosim saludo Apeles toy. Ich imeheeych uje ire ye lotiis Cristope. Tokosim saludo nos wir Aristóbulo ir iiso toy. ¹¹Tokosim ese pihnapst Herodiõn saludo toy. Tokosim saludo toy nos wir Narciso ir iiso uje ye olotiis eyok Irhĩchpe. ¹²Tokosim saludo Trifena hn Trifosa. Wir ochish eyok Irhĩch ir ibiyo. Tokosim saludo Pérsida. Wate shish chish eyok Irhĩch ir ibiyo. Nos wir Porrosht aabo otsahmũr wate. ¹³Tokosim saludo Rufo toy. Wichĩ ma ye lotiis eyok Irhĩchpe. Tokosim waa ir lata saludo toy. Wate shi itso uje yok pati. ¹⁴Tokosim saludo Asíncrito, hn Flegonte hn Hermes hn Patrobas hn Hermas hn nos wir Porrosht aabo uje ode õr ahir. ¹⁵Tokosim saludo Filólogo toy hn Julia hn Nereo hn waa nanimicha toy. Tokosim Olimpás saludo toy hn nos wir uje ye olotiis Cristo uje odechi õr ahir toy. ¹⁶Nos tyenij etiloye. Nos wir uje ye olotiis Cristope uje otakisho lawichĩhi lekitiyo oshim olak saludo.

¹⁷Pishibo watsaklo, titim olak. Eychimlo erze oso uje shish sehe odehek olak hn sehe oduhu olak yewo oniyokõr uje ich kinaha, ye ilo erze ahwoso uje oshiyokorãha olakni. Moymlo wir, ye meylo õr ¹⁸pork ye oniyokõr eyok Irhĩch Jesucristo ir ibiyo. Shi oshiyokõr uje õr ire otsahmũr. Otata lahwoso uje ich ihĩrt pisho shi par otsehnyẽr erze uje ye odĩrehepe. ¹⁹Nos oso ochiraha uje olak dechi dit Roma shish ahakõrlo uje ich om uje Porrosht sahmũr heke ich uhulo yok aylpa, hn sehe tuu olak eykdeyo heke ahakõrlo uje ich om hn ye ahakõrlo uje ich mihnũwo. ²⁰Kimiji olak eykdeyo ilorz ich Porrosht uje shuu oso õr aho kiis ich shuu itso uje arãhalo Satanás hnimich. Sehe tuu eyok Irhĩch Jesucristo dosir olak.

²¹Timoteo ishim olak saludo. Wichĩ ñya yok uje oyiyokõr Cristo ir ibiyo. Lucio hn Jasón hn Sosípater oshim olak saludo toy. Wir yok pihnapso.

²²Yok Tercio uje tichew Pablo ahwoso tibite ana hutita. Tokosim olak saludo pork yok Porrosht aap toy. ²³Gayo ishim olak saludo toy. Yok Pablo. Gayo shuu tiyakaha dahuch. Wichì shish shuu nos Porrosht aabo otakisho lawichìhi dahuch hn oteeychāha Porrosht. Erasto ishim olak saludo toy. Wichì tesorero uje tibey ese dīt ir hnote. Cuarto ishim olak saludo toy. Wichì Porrosht aap toy. ²⁴Sehe tuu eyok Irhīch Jesucristo nos takashim olak. Ich ihārtpa uje itsorz.

Pablo narim Porrosht.

²⁵Titim olak. Porrosht ukurbo deyo de par uje takashim olak. Tanimirāha Porrosht ahwoso hn titim oso tuu itsorz. Titim oso toy uje Jesucristo ishi ōr hnitewihì Porrosht ahirkite. Wap Porrosht ye duhu odirehepe ²⁶per ele ahle ich shuu ochiraha. Erze ahwoso uje profeta poruwo wishì ochichewkite wir uje Porrosht shuu nos erze dihipo kināho ochiraha uje Cristo shiyokōrkite par uje ye olotiis ire hn oshiyokōr uje ire tata. Porrosht yelij nihna ire. ²⁷Wichì shi sohmira hn ich eykdeyo. Sehe tuu nos ye olotiis uje Jesucristo ishi ōr hnitewihì Porrosht ahirkite heke oshuu Porrosht ich dich. Ich ihārtpa uje oniyokōr ir ahwoso oduhu ilorz.